

沫社吟集

越園題簽



沐社吟集序一

嘗謂人生自得之樂。莫若暢抒胸臆。蓋思想情感。至繁複。亦至敏銳。且因時因地因人因物而各異其趨。當其存於中也。每若有所觸而欲一吐爲快。及其形於外也。恍似獲遂所求而無復芥蒂。不使錮閉抑塞。則天機冥然。生趣索然矣。顧思想情感之發抒。不其道。或表見於言語。或箚錄爲文章。或寄託夫管絃。或省識乎圖畫。而求其可朗誦。可沉吟。可永歎。可鼓舞。藉彼籟音。寫我曲。本溫柔敦厚之旨。成幽微緜邈之詞。言志以自放。卽事而感者。詩歌尙已。若夫移風易俗。輔世長民。俾德化之流行。致人於盛軌。斯則詩教所被。厥功尤大。豈第悅性怡情嘯傲自適而已哉。余承乏湘桂鐵路時。同仁中雅好吟詠者。嘗集結詩社。命名曰沐。每以假日休閒。就山巔水涯景物宜人處。相與拈題分韻。唱和爲



歡。興會所至。觴詠並作。滌蕩塵襟。允爲公餘調劑身心之一助。主其事者葉祕書乃偉。以緣起相告。余惟斯社之立。正值抗戰艱苦時期。銅駝荆棘之悲。宮闕黍離之感。殆縈迴於人人方寸間。而諸同仁簿書鞅掌。猶能抽暇作韻語。以抒寫其性靈。凡所比賦。雖多眼前事物。本地風光。而對酒當歌。拔劍長嘯。絃外之音。有不期然而流露者。想見其心花怒放。筆底傳神。固有自得之樂。余不嫻吟事。及觀諸同仁所爲詩詞。覺余平昔胸次所欲消之塊壘。不啻先獲我心。若自其口出。而亦爲之意適神酣。甚矣詩詞動人之深也。今者盟邦奏凱。島國簽降。日月重光。河山再造。而我泮社同仁。有已以身殉難。未及載歌勝利。共覩昇平者。又令人悼念同舟。悲懷逝水。切人琴之愴感。對楮墨而唏噓矣。諸同人爲留取抗戰心聲之紀念。爰集頻年社稿。整理付梓。問序於余。不揣譎陋。爲書所懷如此。至集中錄列篇什。旣重在發表各個人之思想情感。初不欲

以采藻詞章炫新競勝。其於字句之斟酌。聲韻之推敲。固所謂工拙不計者。大雅君子。或亦引爲同調乎。民國三十四年十一月十二日
石志仁序於北平歐美同學會客次

序二

東虜犯上國。八年中佔華夏幅員之太平。詞人墨客。奔迸入楚蜀。張君禮文。年少學佛。習密宗。國難既作。竟出入兵間。時時穿虜營。足跡逾萬里。問其所從事。輒笑而不言。嗣服務於湘桂鐵路。簿書劬劇。乃以公暇與朋儕習爲詩歌。結社曰沐。吟侶凡三十餘人。錄所作。哀然成帙。今夏歸而示余。且乞爲弁言。嗚呼。人喜則思陶。悲則思慍。憂患之作。往往勝於歡娛。士君子丁世亂。多梗觸。涉筆成吟。聊自慰藉。皆天籟也。人力之所不能加也。西南山水名天下。而余足跡至衡嶽爲止。世事稍定。將羸糧而往。社中諸君。尙有執事於斯路者乎。其將爲我導遊也。則是篇爲之左券矣。丙戌重九吳江金天翹松岑甫序。時年七十有四。

沐社吟集題詞

一

妙句新成得自天

本來水木有前緣

盍簪正喜朋能聚

秉筆初吟友共聯

湘桂風塵偏恹草

秦淮歌舞集時賢

多君雅事徵題遍

佳詠何須判後先

鴛湖七十六老人沈聲隱氏題

二

中原戡定得生旋

風雨懷人手一編

蕩滌憂愁唯翰墨

周遊名勝感烽煙

大江東去浪花靜

吾道南行詩草傳

患難相從歌復嘯

雪泥鴻爪話當年

青浦潘其偉仲鐸甫題

沐社社友題名（以齒爲序）

王心恕 凝生又號甯僧

福建閩侯

王 懋 憲宣又號短翁

福建閩侯

曹錫瑁 信侯

河北滄縣

習 崧 自娛

湖北岳陽

馬 襄 文青

湖南長沙

俞弗侯

江蘇江甯

王君放 蘊舫

江西吉安

鄭 培 秀餘

福建閩侯

江 澂 超之

湖北漢口

錢輝宇 羽霄

江蘇太倉

張用魯

廣東番禺

葉在鉉 乃偉

洪 紳 書行

王羽儀

顧震白

袁志箴 少選

凌彥賓

鄧澤華

王建新 見心

羅劫剛

王宗瑜

王元通 懷久

董潤田

汪汝正 味辛

福建閩侯

福建閩侯

江蘇太倉

江西南昌

廣東番禺

湖南東安

河北天津

湖南醴陵

江蘇吳縣

江蘇嘉定

河北豐潤

浙江龍游

陸嘉謨
仲庭

李璫
滋

饒崇德

蘇頌
頌健君

王志中
相宣

李志剛

黃經綸

熊植仁

高光宇
才毅

王國斌

江壽山
石子

鄧平國

張禮文

江蘇銅山

福建閩侯

湖南醴陵

遼寧海城

湖南瀏陽

湖南長沙

湖南瀏陽

浙江會稽

湖南長沙

浙江鄞縣

湖南邵陽

江蘇吳縣

沐社吟集 題名

沐社吟集目錄

卷一

沐社雅集紀勝

感懷

送社友王見心袁少選張用魯入緬

雁峯禊集

卷二

浮萍

詩人節登迴雁峯遙弔三閩大夫

無題

卷四

荷塘泛棹

漁舟唱晚

納涼

卷五

七夕

卷六

新秋

孤雁

中秋

卷七

訪菊

寒蛩

滿城風雨

卷八

紅葉

衡陽雜詠

卷九

賀社友張禮文瀛眷來自吳門

卷十

舉杯邀明月

紀遊

卷十一

最難風雨故人來

小橋流水

卷十二 送張禮文遠行

卷十三 梅訊

瀟湘煙雨

卷十四 雪人

圍爐閒話

湘江大橋通車紀念

卷十五 雜詠

秋心唱和集

附卷一 題社友王羽儀畫冊集

附卷二 挽本社殉難諸友

莽
社
吟
集
目
錄

沐社吟集卷一

沐社雅集紀勝

(以收到先後爲序下做此)

目一(並序)

乃偉

壬午春月。同事張君禮文王君國斌詠雨後桃花詩。和者甚衆。琳琅滿目。美不勝收。集成。會作者於衡陽迴雁峯之中山堂。結社訂盟。推余作主。並命題名。余以此社之成。乃爲我湘桂鐵路同人謀休日消閒之所。嘯傲自遣。杯酒爲歡。故欲以沐名社。取其湘字之水與桂字之木相合。而寓聚合湘桂同事於休沐之日一作觴詠之會之意也。且沐有滌垢去污之義。丁茲世變。望切澄清。吾輩文人。尤須維持風雅。推陳出新。以爲世倡。庶斯文不墜。國運日昌。則此社之立。用意尤大。名既定。衆咸稱是。卽以沐社

雅集紀勝爲第一次集題。爰成斯作。

愛此春光好。及時行樂事。結社訂詩盟。社以泚爲字。一字又一木。其中存深意。吾輩共扶輪。論交重氣類。託迹桂與湘。遨遊來勝地。勝地值芳辰。百花生明媚。寒食節已過。上已日未至。裙屐雁峯巔。禊事且先試。張子最殷勤。王生亦興致。隻雞招近局。折柬時相遺。風雅賴主持。騷壇樹新幟。豈敢望古人。庶幾痾可嗜。學詩比登山。造極原非易。所貴在虛心。求之於寤寐。諸君倚馬才。出句人驚異。咳吐落珠璣。使我益心醉。自問媿不如。何況又附驥。神州看陸沉。斯文遭世棄。惟恐道或窮。聊復爲鼓吹。觴詠猶餘事。匡時乃素志。要使士無遺。盡成國之器。勉哉勗羣朋。此旨永須記。

風雲動寰宇。禹甸胡塵逐。鎖鑰控西南。湘桂飛輪轂。却敵三策勳。
。軍行馬蹄速。書生報國時。走筆利如鏃。羈泊已頻年。念茲每棖
觸。良會集同文。仲春柳舒綠。茗話契蒼苔。詩篇吐珠玉。雨後詠
桃花。絢染兼含蓄。開社期前主者以雨後桃花徵詩限蕭韻隱題面非關競雕蟲。牢愁寫萬斛。
退食欣餘晷。放歌亦自足。翰墨結因緣。賞奇趁休沐。僉議假日爲會期月集一次以
前期徵詠傳觀並付月旦言志且陶情。一洗襟懷俗。吾慚元亮胸。吾媿邊韶腹。吟
事轉相親。學步企高躅。

四三

彥賓

春雨久螻屈。齋冷如入定。嘉會忽招攜。郊遊動清興。且喜解簪束。
。無復畏泥濘。良朋來二仲。賢主開三徑。雁序成翩翻。鶯鳴互聲
應。咳唾灑珠圓。放懷吐瑤孕。雄文共欣賞。奇字相驗證。倚聲詠
冷冷。寒松風入聽。長歌發浩浩。石根白雲凝。枚戰握酒權。弈棋

誇廟勝。不知春光老。但恐金罍罄。衡嶽等拳石。瀟湘視汀滢。路人願之笑。若輩胡悽悽。苜蓿甘如飴。寶似珠照乘。功名壯刀斗。富貴逐鞭鐙。胡爲啜糟粕。章句尋餽釘。豈宜溺儒冠。直須杖叩脛。聞之揖與言。君語誠巧佞。士夫各有志。羣類相逕庭。抱甕嗤轄機。荷簣譏擊磬。守素意自便。舖糟心獨醒。悠然樂天和。疇能惜墮甌。

口四

信侯

時維春月暮。雅集招良友。濟濟共一堂。一一識誰某。天涯同客寄。此會信非偶。新詩分險韻。美酒酌大斗。驚看筆如椽。庭筠八叉手。敢從諸君後。精神強抖擻。衆詩堪籠紗。我詩堪覆瓿。南郭逐隊等。意在掩其醜。醜終不可掩。投李報瓊玖。願與諸君子。相期共悠久。

四五

秀餘

偶從詩酒結苔岑。佳句時聯戛玉音。已看烽烟連象郡。敢期姓氏重雞林。靈均澤畔離騷詠。諸葛隆中梁父吟。爨後焦桐誰識得。餘將秃筆作金鍼。

四六

羽霄

湘江衡嶽足臨登。要仗詩文始可徵。白社步塵慚附驥。青雲得路羨飛鵬。吟風弄月無賓主。引玉拋磚有友朋。但願湘邊重報捷。新詞好共譜蘭陵。

四七

石子

嘉會欣今夕。笑談意不窮。忘年慚後學。高論仰諸公。酒興千杯少。月明萬慮空。纔知此境樂。倚醉嘯長風。

感懷

目一

見心

天南鞏鼓已頻驚。漫道烽煙阻客程。擊楫中流懷祖逖。揚鞭萬里羨班生。人間快事惟摧虜。海外雄風說斬鯨。有志終酬持轡願。狂歌不作斷腸聲。

目二

志中

頻年何事倍傷神。萬里飄零一葉身。鴛枕已虛高閣夢。征衣猶染舊京塵。南來草木凝愁黯。北望關山滴淚新。披髮纓冠空有恨。不堪回首憶前因。

目三

才毅

久客長安不易居。常聞彈鋏歎無魚。勞生豈爲圖溫飽。謀國寧當計

毀譽。身似轉蓬憐草草。人多化蝶夢蘧蘧。家鄉父老猶西望。待報王師奏捷書。

四

經綸

塞上風雲捲地來。乾坤浩劫又重開。南洋北海軍書急。亞雨歐風戰士哀。養虎幾番成大錯。籌兵何日制渠魁。同肩艱鉅應非晚。力挽狂瀾志不灰。

五

崇德

國難當頭敢逸居。天南浪跡一身餘。家山阻隔時縈夢。骨肉流離只望書。誓復中原同敵愾。出征海外共延譽。寇氛好似當階草。願拔青萍奮臂鋤。

六

仲庭

儲書自覺可憐生。回首關山意不平。未改鄉音雙鬢白。生成傲骨寸心明。朋簪欣結苔岑契。詩酒能聯雅俗情。媚世無方應匏繫。此身端合老編氓。

口七

信侯

春山如黛柳如煙。綠暗紅稀三月天。廿載塵勞人草草。浮生大夢蝶翩翩。倘逢北海聯詩酒。會隱東山樂管絃。奈是有家歸未得。幾番搔首意悽然。

口八

少選

萬方多難獨登樓。瘴雨蠻煙眼底收。爲有羈縻憐舞鶴。了無拘束慕閒鷗。行藏未許期陶令。潦倒翻慚作楚囚。一事聊堪相慰藉。他鄉風雅獲同舟。

附疊韻諸作

口一

秀餘

獨上元龍百尺樓。無邊風物眼中收。軒昂器宇雲間鶴。恬淡襟懷海畔鷗。至竟光陰如過客。不教意念類拘囚。壯遊原是男兒事。莫便歸尋范蠡舟。

口二

羽霄

年來我亦怕登樓。萬丈歸忠豈可收。欲語性情如野鶴。偶談功業等浮鷗。歲寒日暮非無友。利鎖名繮不異囚。彈指關山千里隔。煙波何日共扁舟。

口三

懷久

埃警頻傳雁寺樓。春城宿雨未全收。巢泥苦認樑間燕。浴浪閒看水

上鷗。信有文章存節概。忍云身世類羈囚。壯遊萬里終酬願。莫怨東風滯客舟。

口四

信侯

烽煙滿地莫登樓。龍戰玄黃久未收。抱璞含真甘退鷁。隨波逐浪遜沙鷗。負轅我愧鹽車馬。逆耳人嘲文字囚。幸有他山堪借助。還將攻錯感同舟。

口五

前人

豪氣元龍百尺樓。無邊景物望中收。酬庸我輩稱功狗。恬退何人似海鷗。明月三更醒客夢。濁醪一斗醉詩囚。時艱未便容高蹈。莫泛當年范蠡舟。

口六

禮文

休誇寸木聳岑樓。一幻曇花轉眼收。伏櫪年年憐老驥。隨波日日效浮鷗。昂藏君豈池中物。跼促吾如階下囚。美玉待沽宜韞匱。相期共作濟川舟。

送社友王見心袁少選張用魯入緬

口一

志中

蠻雲暑道駕長車。欲闢新程萬里賒。六十年來南國恨。憑君一洗大金沙。

口二

懷久

輪蹄遠拓輔三軍。正是西陲逼寇氛。甲士英鋒原貫日。書生浩氣亦凌雲。脂車待布轉漕策。倚馬行看傳檄文。此去緬疆爲國重。凱歌洽奏跂諸君。

口三

彥賓

暴鯨吹浪淹神陸。樞府重開鎮巴蜀。欲恢夏宇定南夷。溝通緬甸與
新毒。志士聞風慨請纓。長歌高唱西南行。西南叢山神祕國。熱風
炎瘴闕天黑。蛇如車輪鱷如虎。磨牙睽睽狙人側。瀟湘浦暗送行旌
。杜宇聲聲行不得。拔劍起舞爲君歌。丈夫壯志搖山河。衣冠盜賊
兩京滿。江湖何處無風波。人生皓首守戶牖。何如歷險窮巖阿。況
聞緬甸古佛土。茄楠紫檀香繞戶。野人獻玉鮫泣珠。鸚鵡巧言孔雀
舞。丹崖翠巘入靈詩。域外新編古樂府。願君去去勿復顧。手關大
地有盤古。

口四

前人

男兒疇復惜驪歌。萬里春風樂趣多。志勸征途期定遠。功高饋轉羨
蕭何。應知獲虎先探穴。不信飛鳶竟墮波。明日凱旋重聚首。竹枝

添紀密芝那。

口五

經繪

儒生聯袂起湖湘。南服宣勤倍有光。萬里車書通緬域。九州烽火痛遼陽。山翻海倒風輪走。斗轉星移鐵馬颺。抗戰十年操勝算。雄風從此被遐邦。

口六

信侯

扶搖直上奮鵬搏。齊向南溟振羽翰。異日勳名從此建。出門一笑海天寬。中原回首戰雲橫。萬里春風抗手行。何日刀頭聽共唱。重逢不厭酒頻傾。

口七

禮文

目送翩聯啓遠征。乘風我欲逐君行。炎方績紀銘銅柱。異域威宣仰

玉旌。挽粟功高蕭相國。投毫志切漢班生。前程記取停輪聽。莫負終軍願請纓。

口八

乃偉

從戎投筆學班生。萬里春風壯此行。他日功成聞凱奏。安排杯酒好相迎。

口九

羽霄

古緬原藩屬。今瞻上國師。隨軍荒甸遠。轉餉薩江湄。共軌同文日。宣威布德時。盼君籌筆暇。早寄凱旋詩。

口十

秀餘

班生此去若登仙。萬里西征共着鞭。挽粟飛芻勞擘劃。乘風破浪看聯翩。開邊肩負千鈞重。報國心如百鍊堅。返旆他時聞奏捷。爲君

再詠凱旋篇。

口十一

植仁

衡陽聚首結文緣。忽唱驪歌意萬千。他日功成歸北國。好將詩酒祝君前。

口十一

志剛

羽檄頻催動遠征。三春花柳傍行旌。人言擇部風光好。地入平蠻感慨生。敵國干戈方擾攘。漢家文物舊聲名。諸君此去軍輸急。定見南疆鼓吹迎。風儀文采久相承。忽聽驪歌意不勝。詩社桃花吟未了。江城樽酒會何曾。願依北斗瞻雙鯉。好向南溟化遠鵬。行過滇池須記取。石鯨鱗甲助飛騰。

壬午春二月予將之緬佐軍運沐社社友多贈詩壯行詎整裝待發時而緬局日非滇邊告警因暫停征驂以俟後命惟是友生多情不能無

報率成四絕聊答雅誼藉自解嘲云（少選）

剛從湘水締詩盟。又報遐荒事遠征。離緒豪情交織處。一時啼笑不分明。

君問行期未有期。桃花詠後獨支頤。

沐社雅集詩題實以雨後桃花始

不須更惜新亭別

。已聽征途喚子規。

先我出發同人多中途折返矣

造化由來慣阻撓。者番波折合相遭。賺來詩句光千丈。不駕長風亦自豪。

年來無事不蹉跎。辜負良朋企望多。好把青萍三尺劍。留將東海斬鯨波。

沈社吟集卷二

雁峯禊集

以杜詩胡騎中宵堪北走武陵一曲想南征悠悠揚荒山日飄然思不羣分韻爲序

口一（分韻得胡字）

秀餘

一春浙瀝雨如濡。躡屐同披潑墨圖。觴詠不緣烽火廢。情懷敢謂古今殊。隔江世漫譏商女。砭俗時仍賴碩儒。博弈獨賢聊自慰。行沽且向酒家胡。

口二（分韻得騎字）

仲庭

子規聲裏雨如絲。朋侶相招敢後期。修禊蘭亭傳韻事。流觴曲水趁芳時。高談不覺過深夜。薄醉猶能賦小詩。何日孤山同攬勝。青驄雄駿却堪騎。

口二（分韻得中字）

國斌

湘江流水送落紅。雁峯烟雨正溟濛。河山無限傷新色。城郭何堪識舊容。醉紙迷金人盡死。喪文廢古道將窮。忍看故國嘶胡馬。憶別粉鄉歎轉蓬。幾度飄零悲客寄。一朝禊集慶萍逢。蘭亭朋聚乘休沐。絳帳師承若坐風。分韻欣吟玉樹曲。抒懷高唱大江東。年年今日登臨處。安得衣冠滿座中。

口四（分韻得霄字）

信侯

雁峯古名寺。巍然接碧霄。俯首看帆影。夾岸列團焦。蒼烟迷古渡。野徑歸漁樵。湘江衣帶水。日夜去滔滔。行樂須及時。折柬集同僚。乘興一登臨。塊壘爲之消。烹茶沸石鼎。換酒解金貂。相率鳴天籟。太璞貴不雕。曲高和者寡。情真意自饒。吟罷復長嘯。松風聽蕭蕭。相將扶醉歸。燈火已深宵。

口五（分韻得堪字）

羽得

高峯修禊益朋蓼。舉自河山我豈堪。觴詠不妨消塊壘。主賓有美盡東南。已浮蹤似迴翔雁。何苦吟如自縛蠶。一曲驪歌烟樹裏。引人載酒更攜柑。

口六（分韻得北字）

禮文

大塊假我以文章。勝侶清遊日漸長。迴雁峯頭集羣彥。契結苔岑宜詠觴。鑿詩莫謂酸儒事。世局阡危寧敢忘。長唳一聲雁影北。中原滿目猶荆棘。慷慨激昂擊缶晉。心逐雁陣歸不得。翹首依依望江東。江東親舍白雲封。棠棣無花椿萱老。壯志徒懷萬丈虹。一從禹甸風雲黑。定省久疏圖報國。年年浪跡歎蹉跎。拔劍仰天空太息。願憑修禊被不祥。直上扶搖奮雙翼。

口七（分韻得走字）

乃偉

青春受謝知難守。且趁良辰謀聚首。由來同調盡交期。何幸嚶鳴獲
求友。修禊豈關觴詠事。爲被不祥去羣醜。如山憂患待消除。要試
諸君好身手。長才倚馬快飛檄。會看殺敵似拉朽。書生本色最稱強
。豪氣凌空射牛斗。有時橫筆掃千軍。胡騎聞風亦却走。可憐誰復
重斯文。忍使詩書歸覆瓿。只今韻事久銷沉。舖啜風流恐無偶。此
日來追典午賢。失喜因緣結海右。頗疑吾道或未窮。刻意推敲更不
苟。濁世能扶大雅輪。我輩得天已獨厚。况又勝地共遨遊。遠隔塵
囂絕塵垢。亂時一壑倘能專。近局趨招甯敢後。犯寒冒雨上雁峯。
望斷寥天雁何有。眼前景物尙依稀。相對還應同酣酒。酒酣興盡發
高歌。太息魯戈駐難久。欲將興廢問山河。人事浮雲驚變狗。俯仰
百季直俄頃。今之白頭昔黃口。如何行樂不及時。肯任蹉跎到耆耆

賞春要挽春暫住。莫讓春歸呼負負。倘若輕易放春過。定梅花零空對柳。今朝一醉合盡歡。此會年年勞記取。

口八（分韻得武字）

植仁

芳辰值季春。歲序曰壬午。古寺雁峯顛。良朋來相聚。座上有高賢。允文又允武。恍若宴桃園。身如依玉樹。拈韻共吟哦。剪韭具鷄黍。履歷都交錯。杯盤皆易所。把酒酌殘紅。問花花不語。無計留春歸。春歸歸何處。十里綠楊烟。一溪紅杏雨。夕暉掛樹梢。暮鴉數三五。此會樂何如。留連忘歸去。

口九（得分韻陵字）

用魯

裙屐聯翩雁嶺登。雲山如畫映湘蒸。招邀詩侶同康樂。歌笑兵塵似杜陵。好句唱酬愁險韻。他山攻錯藉良朋。飛觴無限流連意。回首

長空玉鏡昇。

口十（分韻得一字）

懷久

衡山七十二峯。迴雁居其一。湘水左縈流。俯仰勢崔嵬。拜瞻佛寺古。遊憩雲林密。烟雨看江城。梵唄聽禪室。景物接幽曠。風標思隱逸。修禊集良朋。暮春有佳日。塵務息鞅掌。清言欣促膝。觴詠寄所懷。琳琅盈篇帙。憂石以敲金。唱和嚴聲律。拈闔更分韻。各逞如椽筆。世亂正未艾。棄文競尙質。結習笑儒酸。靈慧奈囚桎。豈無報國心。應據匡時術。斯語敢誰非。其說容吾畢。嘗聞羽書急。倚歌猶調瑟。敵愾賦同仇。詞源傾汨汨。人情樂舒放。噍殺詎宜窒。杜陵詩史稱。義憤行間溢。昔賢渺難追。卽事多足述。且共被煩憂。長嘯酬蹙築。

口十一（分韻得曲字）

彥賓

壬午歲暮春。修禊雁峯麓。綰轂聯湘桂。清華湛水木。乘暇散煩憂。
詩社名曰沐。知交各忘年。賓從咸不速。睇眄衡雲深。俯眺湘水
綠。烟雨漫江城。鍾磬迴幽谷。奇景幻晴陰。清歌相和屬。分題各
闡字。恰似均社肉。倚歌韻瑯瑯。行吟足踟躕。撚鬚于思斷。搔首
鬢欲禿。或師天籟聲。吟徑撫松竹。或搜風土誌。東望船山屋。得
句手每叉。敲韻躬屢鞠。主憐詩腸瘦。醞茗芳醕沃。詩心淡篆烟。
詞源急瀉瀑。吟成一字穩。喜獲連城玉。苦吟已可憐。戇態殊可掬。
裂石歌原憲。守璞慕顏歎。思超玄象外。何處着榮辱。欽哉諸君
子。文壇著耆宿。大雅賴扶輪。文化資孕育。木鐸振黃魂。鼓吹光
漢族。獻頌生民詩。高歌凱旋曲。

口十一（分韻得想字）

平國

登臨迴雁峯。俯仰滌塵想。入耳鐘聲清。撲眉山色爽。岳屏織綺雲

。石鼓森奇象。聯袂賦新辭。浩然期共養。

口十三（分韻得南字）

崇德

雁峯古寺傍城南。結伴同探霽後嵐。韻門尖叉聯唱和。蔬供菘韭勝肥甘。高談轉劇燈將炷。逸興遄飛酒半酣。此日豪情殊未減。堅貞共矢覺無慚。

口十四（分韻得征字）

味辛

故里多嘉會。勞人獨遠征。蘭亭躡舊夢。萍水訂新盟。攬勝峯迴雁。狂歌酒滿觥。不知身是客。何處惹鄉情。（誌感）
清遊逢假日。春意半陰晴。風雨羣賢集。天涯一雁征。放懷恣嘯傲。乘興布棋枰。舉酒聊相屬。毋令感慨生。（卽事）
幽懷挹清曠。策杖上層楹。乍霽烟籠岫。微風柳轉鶯。落花春自舞。歸牧晚猶征。天故留遊屐。斜陽笑似迎。（卽景）

東閣延多士。詞林許挂名。敢云文會友。每愧筆爲耕。撫景傷增髀。
乘風欲請纓。何當策馬去。塞外一長征。(懷述)

口十五 (分韻得悠字) 調寄搗練子

禮文

遊勝侶。作清遊。迴雁峯頭將韻闌。澹蕩風光憂盡袂。藻思遠逐白
雲悠。

口十六 (分韻得揚字)

經綸

峯前此日敞吟觴。濟濟高賢集一堂。興會不殊王逸少。風流應擬孟
襄陽。窮愁翻幸添詩侶。勝利相期返故鄉。自愧未遑趨雅召。徒瞻
迴雁意飛揚。

口十七 (分韻得荒字)

潤田

干戈荼毒遍遐荒。亂世登臨意渺茫。禊集何妨招勝侶。清遊正好趁

春光。附庸風雅慚時彥。放浪形骸學酒狂。消息盈虛原有數。空談何補愧昂藏。

口十八（分韻得山字）調寄臨江仙

蒯侯

載酒雁峯修禊集，無錢可買名山。白雲深處望鄉關。堪悲湘水逝，妒煞雁羣還。殘缺金甌何策補，復仇快撫刀鐮。病愁詩骨更堅頑。願同舒國難，會看屈荆蠻。

口十九（分韻得日字）調寄菩薩蠻

羽霄

遨遊呼侶三春日。登臨選勝高峯集。往復思悠悠。雁迴何處留。河山遙舉目。待被憂千斛。暮色悵離羣。且將詩韻分。

口二十（分韻得飄字）

才毅

名峯號迴雁。到此俗塵銷。靜靜忘憂患。幽幽避市囂。詩情春雨密

愁緒濁醪澆。勝會蘭亭日。雄心雲外飄。

口二十一（分韻得然字）

少選

烽煙同避到南天。契結蒼岑信有緣。錦繡平添湘水畔。珠璣齊落雁
峯前。遣懷端合耽詩酒。亂耳不教雜管絃。參透彭觴皆妄作。披襟
一嘯樂陶然。

附疊韻一律

彥寶

陰晴無定釀花天。萍聚還留翰墨緣。楚客吳儂歡座右。湘烟岳色照
樽前。更逢賢主催添酒。時向知音誤拂絃。少選見示大寒雁北回春又
作故疊和之去。長歌倚劍獨茫然。

口二十一（分韻得思字）

見心

江城春暮雨如絲。鷓鴣聲聲觸客思。載酒題襟堪遣興。聞鷄舞劍念

匡時。匈奴未破家何在。禹甸重光志不移。結侶登峯舒壯嘯。湘濤怒湧嶽雲馳。

口二十二(分韻得不字)

志中

雁到雁峯迴。雁迴峯自屹。江流去渺茫。草木正葱鬱。黃鸝偶歌聽。輕風時面拂。頻年值亂深。此日將憂被。禊集結同心。杯酒論造物。朱門主易賓。青史誰成佛。雅韻羨蘭亭。忠懷追騷屈。古人久沉湮。古意猶髣髴。雁迴尙有峯。豈可賦詩不。

一二十四(分韻得羣字)

懷久

驚寒雁語杳難聞。求友嚶鳴尙有文。曲水流觴來舊雨。高峯修禊展春雲。願憑佛海回千劫。欣共騷壇暨一軍。衡浦於今多勝日。忘機添得鷺鷗羣。

沐社吟集卷三

浮萍

口一（調寄青玉案）

羽霄

前塵絮影如烟散。早舊夢，橫塘斷。拚與落花隨浪轉。欲歸蹤阻，無依根淺。一任天涯遠。月殘酒醒垂楊岸。梗泛行藏且休怨。渺渺江湖遊已倦。平生離合，幾番涼暖。總爲浮名絆。

口二

秀餘

惠風颺庶類。烟景增妍媚。垂釣傍江干。靜待魚吞餌。遙瞻水上萍。隨岸泛濃翠。天末條鳴條。逐流任所至。卽此悟人生。其理或無二。憶昔客舊京。吟壇論文字。腹笥敢云便。唱酬愧附驥。未幾遭亂離。飄零到茲地。風物雖不殊。忽驚山河異。親朋各一方。把晤

渺難冀。聚散本靡常。百年原如寄。凡事能達觀。寸心亦自遂。收竿理長絲。歸謀片刻醉。四望千點青。頓覺饒春意。

〇三

信侯

結廬傍橫塘。一水開明鏡。退食獨垂釣。手持一竿正。聚散看浮萍。點綴波光淨。隔岸柳絮飛。彌漫徧三徑。同是感飄零。類我跡靡定。重聽河上歌。相憐有同病。

〇四

見心

遊蹤飄泊未堪傷。點翠勻芳到野塘。好織川流成錦繡。肯停步履向滄浪。風來澤畔逢知己。雲擁槎周憶放鄉。日月猶同雙轉轂。應教物我兩相忘。

〇五

懷久

生來無罣礙。水面好爲鄉。鴨泛鋪青渚。蛙鳴綴碧塘。隨緣成聚散。
浪跡問行藏。漫惹飄流感。男兒志四方。

口六

仲庭

方塘半畝碧成茵。爽色迎人不染塵。貼水圓勻三月暮。隨風宛轉綠
波春。豈因聚散悲無定。翻爲飄流益自珍。與子天涯同梗泛。浮蹤
草草感勞薪。

口七

崇德

莫誇錯節笑無根。獨自浮沉獨自蕃。逐浪猶能穿石罅。隨風幸得傍
瓊源。魚磯點點春留迹。鷗港悠悠夢有痕。等是天涯悲暫寄。蓬飄
梗泛不勝繁。

口八

味辛

芙蓉十里任悠悠。不信人間有喜愁。且與閒鷗相契結。偶隨孤棹共夷猶。也曾飄泊如蓬轉。豈肯輕狂逐水流。漫道一身曳青紫。高風直詣赤松遊。

口九

經綸

萍蹤載水任浮沉。逐澗循溪詎有心。欲共烟波泛湖海。每從鷗鷺訂朋簪。千層錦浪連天碧。萬壑金鱗得蔭深。愧與浮生爭聚散。幾回歸去又相臨。

口十

植仁

半畝池塘萬點青。隨風無定浮春水。勸君且莫笑飄零。大抵人生皆如此。

口十一

才毅

一陣輕風泛翠濤。豈因時會遂攀高。飄零身世謫仙感。憔悴江湖屈子騷。薄幙好容覺喋呷。青雲肯羨鶴翔翱。逐波處處思居後。深恐無心繞短篙。

口十一

禮文

飄零莫便嘆無根。世俗平章寧足論。春水有情起綠波。乘風來去亦爲遜。

詩人節登迴雁峯遙弔三閩大夫

口一

信侯

一代詩才付逝波。九閩難叩恨如何。千秋尙有離騷在。細雨斜風弔汨羅。

口二

秀餘

讀罷離騷有所思。孤忠徧不合時宜。瀟湘此日菑蘭感。宮殿當年禾黍悲。苦志原期爲宋啓。微軀終竟侶馮夷。登臨却值端陽節。誰賦大招向水湄。

〇三

乃偉

年年作客遇重五。今又萍飄來湘浦。湘江九派有汨羅。何處招魂恨千古。離憂澤畔且行吟。耿耿孤忠猶在楚。可憐無復解微詞。丈夫竟共波臣伍。後人遙弔古之賢。競渡龍舟溯江滸。追尋往迹渺無痕。入耳嗷嘈喧金鼓。江干遊侶幾萬千。踵接肩摩觀如堵。觀者誰識死者心。謀國心長心自苦。逐臣枉具瓊瑰才。作賦投詩亦無補。莫嗤傳世以詩名。夙志原期作霖雨。此日登臨發古悲。滿懷骯髒向誰吐。餘生偷許老山林。那問狐狸與狼虎。

〇四

查道

節紀詩人五月初。雁峯北睇憶三閩。千秋汨水精靈讓。一卷離騷血淚書。且獻微誠供鬯卣。尙懷馨潔衣荷蕖。長留浩氣彌天地。楚郢秦關總廢墟。

口五

志中

一代詞人關楚運。千秋餘恨弔湘湄。懷才倘際風雲會。絕調離騷賦與誰。

口六

千古懷沙恨未消。那堪風雨又飄飄。三年去國心猶楚。一曲離騷意欲朝。無奈黃鐘輕瓦釜。終教白驥赴江潮。粼粼汨水魂何處。徒向羅淵賦大招。

無題

〇一

秀餘

記得盈盈十五纔。依依婉轉隨人意。明璫翠羽解華粧。淺笑輕顰工巧媚。月露吟成休更慵。鴛鴦繡罷心如醉。女兒莫便往臨邛。寂寞空闈同老驥。

〇二

乃偉

今朝宿雨喜初晴。照眼春光分外明。好向象牀尋夢蝶。閒欹鴛枕聽流鶯。枝頭百囀聲聲怨。花底雙飛款款情。莫道烏蟲無本意。也知短景感浮生。

〇三

懷久

寄跡江城畔。愉閒覽景光。榴枝空自豔。蓮瓣爲誰香。市近鬻難絕。山深夢轉長。笑啼渾不似。借問媚時方。

口四

禮文

扶荔栽成草木春。長生訂有金鈿願。夢醒邯鄲嘆景遷。撩亂心情常
抱恨。

沐社吟集卷四

荷塘泛棹

口一

禮文

火織薰萬象。炎風肆奇熯。揮汗如牛喘。煦沫若鮒涸。安得清暑殿。
層冰踏變脚。遂覓水簾泉。縱舟在澗壑。一塘如鏡明。清波橫略
約。更有萬柄荷。衆香生妙覺。素性嗜林泉。儻然侶野鶴。宛生極
樂國。物我兩忘却。可笑趨炎人。那識風泉樂。何如老漁子。夜月
花溪泊。一聲款乃起。烟波自漠漠。

口二

彥質

薔薇吹落花如霰。春風歸了炎風煽。繡線慵拈倚畫闌。秋千舞罷人

初倦。隔浦遙呼打漿迎。茜裙爭卸相遊衍。障袖帆輕楊柳風。擲簫聲溢芙蓉院。千朵雲團錦繡圍。萬柄風搖白羽扇。還疑寒碧染紈裙。忽覺幽香飛粉面。翠荇絲絲繞畫橈。紅菖盈盈亂釵燕。唱歌莫唱懊儂曲。懊盡儂心聲自顫。採蓮莫擾睡鴛鴦。驚起鴛鴦餘夢戀。願憑雙鯉約伊人。莫待荷枯秋雨戰。

口三（調寄搗練子）

羽霄

紅意淡，綠情閒。世界清涼別有天。拂葉披花雙漿影，幾曾留在畫橋邊。

口四

才毅

涼風天未起。羽扇初停揮。輕漿涼波皺。暗香撲鼻微。身隨翠蓋轉。心逐白雲飛。立武名湖裏。應知景物非。

口五

秀餘

赤帝當權火傘張。狂揮蒲扇北窗臥。宅畔方塘一鑑開。亭亭淨立香
遠播。驕陽傍晚半銜山。泛棹逍遙成日課。容與中流任所之。蒸鬱
斯時直蟻磨。少焉涼颼拂玉盤。煩襟盡澹當風坐。颯強猶能抗炎威
。且復傾樽聊自賀。碧筒助飲沁心脾。蓮子清芳堪酒佐。探得蓮花
恰滿舟。歸向蕭齋供高坐。

口六（調寄釣船笛）

懷久

遠樹唱新蟬，又報採蓮時節。閒約芙蕖塘畔，共香風清拂。依紅
泛綠夕陽斜，愛汝却心潔。舊夢容與玄武，正羹調冰雪。

口七

志中

鸞曉微風起。邀朋泛棹行。滿塘蓮葉好。一片櫓聲清。北海空回憶

西湖不勝情。卽今多悵觸。渾欲夢難成。

漁舟唱晚

口一

禮文

漁歌忽起傍城郭。晾網船梢正日落。呼婦將魚換酒酌。解衣酣飲醉伸脚。每款世情多險惡。螳螂畢竟遇黃雀。惟有天真得至樂。滄浪幾聽清響作。

口二

味辛

斜陽半持晚風飈。萬壑松雲一葉舸。夾岸炊烟緣壁合，橫天雁影掠檣高。推篷且自邀新月。擱網何妨傾濁醪。歌罷滄浪心更逸。飄飄無復憶塵勞。

口三

秀餘

吾羨垂綸人。烟波任往過。方曉汲清湘。傍崖宿獨夜。惟聞款乃聲。
。不畏江潮大。撒網獲巨鱗。同舟喜相賀。扣舷向夕陽。漁歌互唱
和。有時聲抑揚。偶亦一頓挫。有時遏行雲。商聲如入破。響窮彭
蠡濱。傾樽陳膾炙。興盡更已闌。酩酊各高臥。疑是葛天民。古人
堪並駕。

口四（調寄碧雲深）

懷久

江月大。漁舟聚處漁歌疊。漁歌疊。聲聲似訴，滿腔沉鬱，浪翻
蛟窟何時歇。尊罍空憶鄉情切。難禁飄泊，印添鴻雪。

口五

志中

江干欲夕羨漁情。一葉輕舟自在橫。賣得魚多還唱曲。聲聲吹入晚
風清。

口六

信候

湘江之水傍城郭。楊柳樓臺看隱約。泛宅浮家羨老漁。輕舟晚向風前泊。網得錦鱗謀醉飽。月白風清獨自酌。不須檀板與金樽。扣舷一曲有至樂。歌罷仰首望長空。明星顆顆生芒角。休向滄海作遠遊。滄海時虞風濤惡。但願看徧好湖山。莫待臥遊圖五嶽。

口七

用卷

鎖日垂竿在水邊。流鶯啼老夕陽天。釣餘歌醉船頭臥。荷笠披簑樂似仙。

納涼

口一

卷餘

四時相代謝。我獨畏炎夏。所畏在驕陽。其熱手可炙。浹背汗如漿。

。惶惶蟻旋磨。避向深山中。誅茅尋小舍。樹影蔭窗櫺。松濤喧日夜。環宅水一泓。繞園竹千个。紅掌偶泊浮。綠雲時穉。蟬聲繼續鳴。菡萏香微播。磅礴一解衣。跣足科頭坐。心與身俱忘。飄飄欲羽化。煩慮盡蠲除。涼風吹入座。此境渾如仙。君應爲我賀。

口二

信候

萬里長征別河朔。到處湖山看類數。昔日巴蜀禮峨眉。今來湘衡瞻南嶽。南嶽可望不可登。驕陽肆虐氣如蒸。浮瓜沈李憶陳思。清談煮茗招良朋。滿地濃陰看雲過。枝頭鳥語相唱和。披襟當風溽暑消。幽篁千竿翻个个。頭足科跣亦自快。置身疑在紅塵外。莫將冷暖說人情。此間終是清涼界。

口三

忘中

揮扇時時懶。深宵睡未成。吾心原自熱。且莫怨風輕。

口四

乃偉

溽暑熱如蒸。炎威不可勝。汗流疑雨下。氣鬱望雲騰。何以消長夏。
居然喚買冰。得時休再待。問價莫相增。一片壺中在。數層筐上
乘。原期驅綠螿。却使致青蠅。陋室常孤坐。危欄任獨憑。安閒方
自適。清靜更堪矜。習習涼風過。珊珊月影升。忘憂惟高枕。竹榻
是良朋。

口五

用魯

艇小人堪住。風清月自明。夜深涼似水。更愛碧瀾平。

口六

石子

跣足科頭快若何。緣楊堤外送涼多。樓台夜靜迎新月，把盞披襟擊
節歌。

沐社吟集卷五

七夕（限用社少陵贈起居舍人澄詩原韻）

口一

憲宜

俸錢一負恨無邊。應羨人間選壻賢。早歲空憐曾密誓。明朝誰識又離筵。總疑秋色盈河漢。却憶長歌到薊篇。莫乞城中避地巧。年來烽火苦漫天。

口二

志中

交織離愁銀漢邊。關雎底事詠前賢。終年悵結神仙眷。一夕歡成兒女筵。乞巧針絲循舊俗。懷人墨淚入新篇。鵲橋未許征夫渡。望斷星河萬里天。

口三

懷久

銀河風月總無邊。牧豎難忘織女賢。隔歲言歡仙作馭。今宵乞巧俗
張筵。稠情但譜相思曲。韻事休歌長恨篇。堪恨雙星緣永結。人間
別鵲正呼天。

口四

彥費

萬家兒女樂無邊。共仰黃姑賓敬賢。髣髴玉珂臨繡闥。續粉瓜果肆
華筵。鵲僑豔跡高唐賦。銀漢澄懷秋水篇。漫向仙姬事乞巧。人生
巧處善觀天。

口五

禮文

河阻雙星各一邊。澆愁賴有酒中賢。唐宮此夕釵鐲匣。漢殿當年瓜
果筵。長恨興歌聊寄詠。銷魂別緒合成篇。鵲橋倘肯朝朝駕。不獨

黃姑載二天。

口六

宗瑜

銀河月色隱中邊。去國原來爲避賢。極目烽烟迷鵲渡。滿城風雨送華筵。隔年一償相思債。此夕徵歌長恨篇。漫道神仙終眷屬。依然無石補情天。

口七

乃偉

鵲橋高架銀河邊。佳話風流憶昔賢。乞巧有心誰解珮。結緣何處孰當筵。經年常掬多情淚。此夜難忘長恨篇。夢裏相逢須盡興。莫教一覺又人天。

口八

秀餘

銀河皎潔景無邊。遣興頻中酒聖賢。閒看兒童拈綵線。虔陳瓜果供

芳筵。空餘長恨相逢夕。何限銷魂送到篇。寄語雙星休悵惘。精誠自古可回天。

日九（調寄「痕沙」）

羽霏

幾許深醉密意。一抹銀河如洗。風月又良宵。欲魂銷。萬古魂銷不盡。鵲也將橋填恨。天上恨年年。况人間。

新秋

才毅

口一

初生玉露襲單衣。陣陣金風暑氣微。西陸蟬聲獨斷續。誰憐羽扇少人揮。（卽景）

荒鷺逢秋逐白雲。摩空竟欲蔽朝暉。誰知臂犬鱗鷹在。一擊功成不世勳。（卽事）

尊鱸自古說江南。久別家鄉憶味甘。暮地秋風羈客感。欲歸不得我何堪。(偶感)

一別鑑湖又七年。稽山秋色夢中妍。親朋此日皆星散。羽檄烽煙到處傳。(懷舊)

口二

彥賓

秋至天地肅。暑殘人亦便。心驚歸燕急。夢戀膾鱸鮮。池月憐初白。紅花愛晚妍。何當鼓靈瑟。相與和雲篇

口三

前人

井梧知節序。錦瑟怨華年。潦淨桐初淥。霜餘楓漸妍。纖雲連過雁。深樹約鳴蟬。砧破清閨夢。何時靖塞邊。

口四

倩侯

暮聞天際雁聲孤。尙有殘蟬戀碧梧。自笑熱中隨暑盡。西風獨立憶
尊鱸。

口五

禮文

涼風驅溽暑。梧葉落庭前。雲斂高空淨。水長遠浦連。清蟬聲斷續。
寒雁影盤旋。景物非淒切。襟懷倍爽然。

泚社吟集卷六

孤雁

口一

志中

時非節易願常違。獨向西風振羽衣。萬里長空身一葉。帶將秋色漢關飛。

口二

信侯

志縱摩天力已孤。羞隨舊侶共稱奴。蘆花淺水悲鳴處。點綴秋光入畫圖。

口三

味辛

蓼汀顧影獨依依。豈戀秋容未肯歸。祇是滿天風雨惡。歛將毛羽待

晴暉。

四

秀餘

漫悲失侶落平沙。漢苑須防一失加。秋水蘆洲堪避弋。留將素羽傲霜華。

五

禮文

不盡離羣感。棲遲濟一隅。稱奴憐舊侶。避弋獨銜蘆。

六

乃偉

見說離羣雁。新從天外來。長征千里苦。清淚一聲哀。足不傳書信。身猶帶劫灰。故園何所似。消息費疑猜。

七

彥賓

徘徊沙際雁。長唳九天聞。悵失菰蒲侶。羞同燕雀羣。影憐一片月

。力瘁萬重雲。欲寄難成字。無端客淚紛。

口八

懷久

應候來南國。江橫白露秋。臨風寒羽翼。顧影瘦汀洲。莫怪傳書誤。
。誰消避弋愁。湘衡未歸客。好共訴綢繆。

口九

才毅

衡浦成羣趁落暉。淒涼失侶竟南飛。浮踪自惜羽毛潔。避弋何當泥
爪稀。塞北傳書程可計。遼東歸夢願終違。至今獨對空江月。天地
茫茫孰可依。

口十

經綸

逐陣隨陽志不孤。如何隻影到天隅。途多繪繳飛難進。聲入蘆葑怨
似呼。北地河山依舊否。南都風土勝前無。書成試寄中原去。指日

三師討逆胡。

中秋

日一

志中

冷冷玉露未寒前。剪剪西風欲暮天。桐葉蕭疏楓葉淡。蘆花遙曳桂
花妍。閨中刀尺僱今日。嶺外音書斷隔年。寄語天涯秋漫老。征衣
猶薄客心煎。

日二

彥賓

四度浮湘看月圓。去來鴻燕共蹣跚。添薪笑欲攀丹桂。辟穀宜分搗
汞鉛。幾處彩雲籠野火。誰家冰鏡照華筵。九閩風凜高難問。空對
蟬娟一惘然。

口三

經綸

清光萬里夜如娟。秋正中宮月正圓。地是去年團敘處。主仍舊日結隣賢。芬芳最愛庭前桂。肅殺遙隣塞外天。莫把牢愁負佳節。且憑樽酒共陶然。

口四

秀餘

廣寒猶自鬥蟬娟。作意清光分外圓。萬里遼西思婦夢。誰憐征戍尙年年。

口五

禮文

秋色平分日。清輝分外妍。一輪何皎若。萬象正瑩然。世變應難照。甌殘豈易全。砧聲疑兔搗。魅影待犀燃。經歲戎衣敝。幾家客夢圓。况傳夷陣轉。又看戍營連。遯跡渾無地。撫躬尙有天。非關戀

光景。深夜不成眠。

目六（調寄探桑子）

光宇

廣寒宮闕歡聲動，玉兔停妍。丹桂香傳。對對飛仙舞九天。世間今夜爭看月，羈旅頻年。思婦誰憐。每到中秋萬感牽。

目七（調寄念奴嬌）

羽霄

月圓秋半，又江城、如冰冷涵空碧。萬戶千門開不夜，宇宙晶瑩澄澈。天上何年，人間何世，舊恨新愁織。陸離光怪。任教犀照難徹。因念禹甸沈沈，瘡痍滿眼，到處烽烟逼。戍角哀笳聲萬里，換盡歌台笙笛。老壯頭顱，嬋娟形影，冉冉成孤寂。醉來凝望，斷山零水猶昔。

附懷久中秋舊作

民卅中秋節。適值星期。與蔣君韻樓袁君心堂相約作南鄉之遊。承車渡所蒯主任碩嘉金君仲芬劉君可均指導。并鄭女士及內子共八人。詣黃茶嶺外劉家村舍。把盞傾談。盡歡竟日。步月而歸。經車渡所。東道主人復殷勤款待。買棹送行。隆情可感。爲賦排律五言十二韻紀實。並以誌謝。

共赴郊遊約。天高秋正中。橫塘收薄霧。平野掠輕風。晚稻抽芒秀

。新苾葦拔指葱。鱖輿支弱步。

袁君心堂與內子俱乘藤椅代步

茅舍息勞蹤。煮茗談趨

健。烹肴飲轉洪。勸酬寧免俗，憂患且防空。

時敵機空襲頓繁

嶺外鴻飛杳。

檐前雀噪工。閒情消白晝。

是日談詩博弈逸興遄飛

皓魄戀蒼穹。踏月虫聲切。披

星入影重。渡頭留別意。舟上送行踪。自覺明簪樂。還思將士功

湘北抗戰再度告捷株衡得隨長沙前綫轉危爲安

詩成餘激壯。合唱大江東。

沐社吟集卷七

訪菊

口一

懷久

閒來秋圃偶徘徊。簇簇寒英帶雨開。肥瘦千般終洒落。淡濃一例絕塵埃。漫嗟身世籬邊寄。且喜手神筆底裁。三徑久荒歸未得。新知晤對合銜杯。帶得秋光入座來。風亭水榭共徘徊。寄情却喜花初放。對景休辜句費裁。傲骨祇隨高士隱。素心端合美人偎。騁懷遊目尋常事。相賞知音莫漫猜。清泉白石畫欄東。好是三三曲徑通。冷豔漸舒迎曉日。寒香微透送秋風。餐英未許瓊枝折。列錦還宜玉檻櫺。難得盟儔成雅集。聯吟且試學雕蟲。

口二

彥賓

秋色如煙淡欲無。秋魂可似去年臞。合邀元亮開三經。尙憶袁宏送一壺。簪髻早憐羞寶鏡。尋詩翻忘斷吟鬚。攜鐙倍借霜姿豔。擬築東籬作短扶。

三

用魯

漫嫌秋圃意闌珊。尙有孤芳在此間。對月猶憐妝太素。微霜應羨節彌艱。兩間詩感騷人淚。三徑情牽散吏還。何處白衣相送酒。東籬拚與醉如山。

四

才毅

陰雨連朝繫客情。雲開日出喜初晴。秋容老圃三分淡。夕照東籬一片瓊。扶杖何當添眷戀。款關獨自憶經營。歸來詩思濃如許。明月當空水影清。

口五

植仁

杖籬攜酒訪東籬。金縷絲絲綴滿枝。傲骨不嫌三徑冷。孤芳誰謂九秋遲。自欣晚節同陶令。且把新詩效牧之。信是黃花前有約。天高霜重蟹肥時。

口六

經緯

秋高霜冷百花殘。籬畔殷勤每探看。三徑坐忘時久暫。一杯醉醒意闌珊。停車莫漫催歸去。對月還期作曠觀。悟到等閒名利盡。何如爾我共盤桓。

口七

乃偉

訪菊東籬自舉觴。滿城風雨送重陽。留將詩骨堅頑在。好共黃花鬥晚香。無聊猶自放顛癡。百劫尋芳尙酒卮。長立籬邊緣底事。

殘叢賸有傲霜枝。
殘叢猶賸傲霜枝。相對還應酒滿卮。莫待西風吹更急。無多秋色繞東籬。
百鍊難爲繞指柔。生成傲骨壓羣流。尊前且漫傷搖落。晚節芳留千古秋。
名花喜傍短籬栽。淺綠深黃次第開。但願明年秋更好。故園相約賦歸來。

口八

信侯

霜侵露冷獨矜持。爲訪清臞絕世姿。爭道崢嶸多傲骨。問君何事寄人籬。

口九

秀餘

扶筇此日向東籬。三徑猶存冷豔姿。傲骨與君堪比瘦。殘秋霜雪任相欺。

口十

憲宜

呼童載酒步斜陽。何處風來有晚香。怪底籬間饒秀色。却因傲骨最
經霜。

口十一

文青

扶筇日日向東籬。爲探黃花放幾枝。載酒尋踪三徑裏。醉人秋色傲
霜姿。

寒蛩

口一

味辛

西風淒短景。惟爾感時深。骨並黃花瘦。聲隨白露瘖。雄心寒未死。
。好夢夜難任。一自秋光老。王孫不可尋。

口二

禮文

殘蛩藏砌下。露重怯涼秋。餘勇雖能鼓。悲陰尙未休。如催閨婦織

。易惹旅人愁。此日金風起。號寒僅爾否。

口三

植仁

蛩蛩在庭戶。慣作不平鳴。促織情何急。悲秋意若驚。霜寒憐翅薄。月白喜聲清。最是西風緊。蛩蛩寄此生。

口四

才毅

身世泣窮途。飄搖似荻蘆。敢望登雲路。牆隅唧唧呼。

口五

信侯

蜉蝣身世亦堪傷。喜怒由人笑爾狂。戰局已終誰勝負。至今猶說半開堂。

口六

憲宣

抱樹棲鴉夜色涼。一燈淒切月昏黃。草間生活秋來慣。不似人家燕子忙。

滿城風雨

口一

才發

萬里西來幾度秋。連朝風雨更添愁。歸鞭屢爲烽烟滯。怕聽湘江水北流。
金飈敲葉一天秋。疎柳殘荷帶雨愁。最憶楓橋舟夜泊。鐘聲隱約送寒流。
滿目淒涼蘆荻洲。紅蓼白鷺渚烟秋。霜天雁陣橫空過。細雨斜風一葉舟。
坐聽江濤嗚咽流。山城風雨動鄉愁。茱萸此日知誰插。昆弟天涯各一陬。
佳節重陽落木秋。誰知風雨滿江樓。詩情酒興濃如許。却恨登臨願未酬。
衡岳巍然勝跡留。江山依舊缺金甌。風淒雨冷添愁緒。禹甸神州何日收。

口二

憲宣

細數蕭疏葉落聲。宵來萬戶耐愁聽。明朝怕又催租至。浪說能詩句不成。

口三

信候

重九惟將詩酒娛。惱人生計等催租。瀟湘盡日烟雲裏。似展米家潑墨圖。落葉蕭蕭感暮秋。滄波猶撼岳陽樓。胡塵未掃詩心減。烟雨迷離楚客愁。

沐社吟集卷八

紅葉

口一

咏辛

記曾相訪到棲霞。一片紅雲望眼遮。今日寒林憔悴甚。空餘血淚泣飛鴉。

口二

乃偉

霜姿好作畫圖看。掩映風前似染丹。且喜秋光猶未老。却憐春色已先殘。皇宮人渺題詩在。御苑溝深逐水寒。消息隔牆如可遞。莫辭辛苦莫辭難。

口三

禮文

萬樹胭脂染。堪經玉露凋。不隨芳草萎。還趁夕陽嬌。醉蝶千回舞。
。流霞一望遙。秋來多麗景。吟侶合相邀。

口四

信候

霜華歷盡自蕭疏。凡卉豈容紫亂朱。但得良媒詩句在。何妨晚景到
桑榆。

口五

秀餘

秋山蔚作赤城霞。燦爛渾如二月花。不是宮人題句在。天台疑欲乞
胡麻。

口六

憲宜

園林景物尚依稀。太息繁華過眼非。漫倚朱顏矜晚境。更無綠鬢鬥
芳菲。亂山合沓鳴蛩急。老樹婆婆塞雁歸。一自題詩人去後。御溝

秋水有鴻飛。

口七

查賓

粧點郊原妙化工。霜颺一掃繁花空。彩雲亂颺半川水。斜日流暉萬樹楓。錦繡筵張武夷宴。珊瑚擊出蓬萊宮。尋詩愛晚亭前坐。好句飛來酒正中。

口八

健君

斜日寒林散漫遊。閒情逸韻兩悠悠。亂流激石歸鴉噪。野寺疏鐘暮靄浮。萬片紅楓翻落照。一泓清潦映吟眸。歸來拾葉題詩句。枝影橫身月戴頭。

口九

志中

嚴霜冷露捲西風。欲把韶華掃碧空。畢竟楓林存血性。梢頭齊染杜

鶻紅。丰神傲菊菊無華。秋老重看二月花。紅到深時齊下葉。
好傳消息遍天涯。

口十

才毅

曾隨溝水出宮牆。却爲題詩面帝王。冷眼遍看來去客。年年此日換
新妝。六朝勝跡話棲霞。滿地落紅豔若花。但見金陵王氣盡。
妖氛籠罩舊京華。宮闕巍巍憶舊都。西山紅葉勝三吳。當年多
少趨炎客。匍伏胡廷竟作奴。天平景物甲吳中。每到深秋一片
紅。却憶故橋唐宋傳。寒山寺外隔堤楓。曾向稽山認畫容。丹楓
古柏雜蒼松。輕舟酒載鏡湖去。紅葉平添詩意濃。

口十一 調寄瑣窗寒

羽書

本期因事阻未及爲卽以棲霞山觀紅葉舊作實之
白鹿泉荒，重來漫問，勝遊前度。齊梁柳色，歎與夕陽終古。但登

臨，高唱大江，滿腔氣向西風吐。任杜鵑啼徹。楓林霜訊，又將秋暮。空訴。衷情苦。賸寂寞名山，冷紅自舞。平生負了，怕見題詩鴛侶。縱無香，天上返魄，有懷且莫吟恨賦。算年年，斷夢飄零，半在雲深處。

口十一

壞久

西風吹籜報秋深。一片丹霞鎖遠林。却憶吳江添落寞。幾番冷豔夢中尋。散錦遙天絢染工。懷人曾與寄深衷。祇今水淺難航葦。空負靈犀一點通。

衡陽雜詠

口一

信侯

愧無事業紀弓弣。老去行踪等繫匏。爲愛春郊風物好。清遊偶過茶

山坳。午夜歌聲振鼓鏡。家家媚灶具良庖。閉門晝粥安吾素。
榮辱於今夢早拋。蝸居恰對雁峯高。買醉玉樓快老饕。最是惹
人留戀處。草橋石鼓東洲桃。

口二

才發

峯連南嶽遠相承。迴雁佳名古著稱。歷盡劫灰烽火後。梵鐘猶自伴
青燈。(迴雁峯)

嶺以黃巢稱。臨江感慨增。東洲桃葉岸。遙望水雲蒸。(黃巢嶺)
小城曾建國。廢苑偶攀登。三百年前事。至今未足憑。(吳王廢墟)

口三

彥賓

嵯峨石鼓印澄潭。鹿洞猶餘教澤覃。最羨楚村竹箭美。彭郎千古一
奇男。雁峯曾是舊停驂。劫後歸來剩破龕。無復當年人跪燭。

元宵何處拾遺蓼。客程飄忽隨陽雁。儂意纏綿再熟蠶。雁已迴
峯人未至。情深空自碧湘潭。觀風遮莫到衡南。衣食住行總不
堪。晴是香爐雨墨海。祇宜枯坐作禪參。

口四

秀餘

玉樓東且解貧饑。麻辣雛雞味不凡。滿座高朋顏盡汗。湘人嗜好異
酸鹹。數椽茅舍半依巖。遠岫殘陽一線銜。隔浦漁歌聲互和。
西風惻惻送歸帆。

口五

乃偉

甯無王粲登樓感。獨立蒼茫暮靄中。千里斷鴻閩海闊。一聲歸雁楚
天空。青山紅樹懸殘照。古寺疏鐘送晚風。有意題糕聊應景。無如
詩筆總難工。

口六

懷久

結伴賦清遊。塵襟一舒放。鼓棹下湘江。塔影珠暉望。七里御風行。
。沙灘白一片。紅樹間青山。斯景真幽倩。杖履印鴻泥。拾級高崗
上。半山一卷亭。應有書聲朗。浮屠歎奇觀。層層螺盤曲。一綫地
天通。與僧談忘俗。（遊珠暉塔）

沐社吟集卷九

賀社友張禮文瀛眷來自吳門

口一

信侯

吳郡久傳思曼才。風流當日想丰裁。銀河不羨鷓橋渡。且看梯山航海來。六載征塵滿客衣。沈郎清減舊腰圍。今朝了却想思債。喜見雙雙燕子飛。異地重逢樂不支。回頭往日悔輕離。畫眉欲問張京兆。深淺可曾似舊時。伉儷情深久別離。乍逢各自訴相思。春光旖旎休辜負。正是月圓花好時。

口一

秀餘

多情夫婿覓封侯。恨不來風化石尤。千里間關甘履險。春光長願爲郎留。烽煙遍地獨浮湘。弱質伶仃欲斷腸。今日相逢疑是夢。

爲郎憔悴却羞郎。相思兩地此心同。幸有靈犀一點通。無限溫柔情比水。願將終老是鄉中。願作鴛鴦不羨仙。重逢亂後樂無邊。畫眉韻事君家擅。着意描成月半絃。

日三

乃偉

京兆多情擅畫眉。眉痕深淺總宜時。誰知亂後風流歇。閑煞張郎筆一枝。別來聞說已多時。兩地相思苦可知。此日重逢春正好。還應同醉合歡卮。伊人長隔海天遙。歲歲空勞望鵲橋。不道無橋猶可渡。萬重離恨一時消。萬里相尋學孟姜。女兒至竟最情長。而今再莫封侯誤。要念溫柔老是鄉。

日四

味辛

海上痼癩望眼遮。權將休咎卜燈花。果然占得紅鸞喜。撮合何須古

押衙。亂離身世各西東。賴有靈犀一點通。畢竟多情債素願。
尋夫馬到便成功。蛾眉暗淡幾經秋。乍見翻爲京兆羞。試向新
粧描舊筆。可能深淺入時不。怪底今朝喜鵲喧。團圞有慶合開
罇。與郎重試調羹手。載識酸臠載笑盲。

口五

懷久

衡浦頻年駐客蹤。望深禹甸息狼烽。春山夢裏添新黛。想見庭闈婦
德容。閨中近訊意多慵。玉樹飄零唱懊儂。却喜慰情有夫壻。
魚軒遠迓豁心胸。行來水複又山重。千重征衣帶露濃。聞說櫂
舟乘舫篋。一時艱險訴無從。至情畢竟慰離悰。歷盡風霜一笑
逢。舊恨漫教撩此日。團圞合醉酒千鐘。

口六

用魯

流離兩地疊經年。久別重逢樂似仙。亂世幾人全骨肉。羨君鸚鵡又

聯翩。

口七

查賓

芳春曾負六年期。千里重逢慰夢思。一點靈犀晨復夜。幾回魔劫險如夷。樂昌鏡合憐茹苦。銀漢橋填樂倡隨。好是君家傳彩筆。商量深淺巧添眉。

口八

健君

鳳泊鸞飄歲幾遷。天涯喜見月重圓。關山險阻驚飛渡。烽火瀟漫話劫年。慶是孟珠歸合浦。巧將徐鏡認湘堧。艱難始識恩情重。好夢溫時却勝前。

口九

志中

萬里西行不顧身。相逢終屬有情人。兩行熱淚說鄉國。一片堅心脫

敵塵。好合月圓湘水夜。聯翩影共雁峯春。更將無限纏綿意。早卜
熊羆入夢因。

口十

羽 雲

禮文瀛眷間關抵衡。沐社同仁賦詩相慶。余在遠道。亦晉一章。
又是天涯綠滿條。懷人半道料魂銷。脂車輾斷關山月。候館望穿霧
露朝。重聚應溫新冷夢。長征倘減舊圍腰。遙知此日眉愁掃。寄語
張郎細細描。

人月圓有序

民三十二年春。內子自蘇州故里冒險遠行來從余。衡陽沐社同
人設宴賦詩相賀。意可感也。天涯同渡七夕。余思悠然。乃賦
此解。既成。集所贈詩而殿之。

而今休羨雙星聚，此夕鏡重圓。銀河難渡，間關易越，天上人間。

• 憶還春日，與同夢起，爲畫眉添。我家韻事，朋從謔後，齊到吟邊。

沐社吟集卷十

舉杯邀明月

口一

信侯

親朋悲遠別。誰與把愁消。獨酌對明月。亦可慰寂寥。分雖隔雲泥。
興至聊相邀。如何團欒影。翻將離恨撩。
舉杯月在手。飲罷月在天。我已頽然醉。月影自娟娟。吞之不能盡。
常向離人圓。離人猶未歸。願汝上下弦。

口二

彥賓

本住赤霞城。塵謫離碧霄。飽看炎涼態。跼處如歌焦。泥婦糞清酒。
爲我澣煩囂。明月如故人。開簾恰相邀。擎杯月在手。激灑酒波
搖。欲吸杯中影。杯盡影已消。舉頭忽見月。娟娟笑復招。初杯月

始白。百杯月暈潮。散盡今古愁。胸中塊壘澆。長願月下飲。臥醉枕詩瓢。

口三

禮文

暫息交遊日。流風慕孝標。舉觴愁獨坐。得月喜相邀。爲有清光滿。遂將俗慮消。陶然吾未醉。躡履揖松喬。

口四

味辛

浩魄澄虛碧。嘉朋蒞夙邀。暢懷傾玉斝。豪氣拂霜杓。喜挹清光墮。愁將塊壘澆。願常終此席。良夜復迢迢。

口五

秀餘

樓台如浸夜迢迢。曲院何人弄玉簫。欲約素娥來作伴。敢憑紅友爲相邀。盤桓忘卻霜華重。寂寞誰將客思銷。今夕擎杯拚一醉。再

無長物典金貂。

口六

乃偉

天上瓊樓入望遙。人間誰與慰吾寥。窗前明月階前影。相對何如一
醉邀。

紀遊

南嶽紀遊

口一

彥賓

嶽峙南天一柱擎。招提山半界三清。兩輪日月籠襟袖。六幅瀟湘折
帶縈。石鼎松烟煎白菊。長鑱木柄劖黃精。鶴蹤飄忽雲如海。難得
伊人共偶耕。竹輿衝破翠煙嵐。畫意詩心互討探。山帶晚晴飛
紫蓋。瀑添新雨落絲潭。長楸嘯似笙鏞韻。稚筍鮮於梁肉甘。羨煞

蓮峯老道士。白雲明月一肩擔。

口二

乃偉

七十二峯高插天。祝融更聳入雲煙。登臨絕頂尊惟我。環拱諸山列

若仙。磨鏡臺前長佞佛。

臺距半山亭四里懷讓七祖弟子道一在此悟道

藏經殿裏好逃禪。原爲六朝惠思

祖師道場陳後主妃避亂隱此皈依思禪師

老僧最解閑中趣。抱月聽泉自在眠。

附和詩

秀餘

崔巍聳立鎖南天。遠挹晴嵐接紫煙。躡屐每思邀勝侶。登峯若欲傲飛仙。迷途證悟無生旨。面壁參修一味禪。願我塵緣殊未了。何時歸伴白雲眠。

口三

懷久

爲訪名山結伴遊。上峯寺裏小勾留。何須遠說三千界。浩渺煙雲眼底收。（上峯寺止宿卽景）

福嚴寺上息遊蹤。難得高僧一笑逢。挹翠開軒還負曝。溪聲山色豁心胸。寺外山壁有了然題
刊溪聲山色四字（福嚴寺小憩留贈了然上人）

宰輔中興仗遠謀。功成身退足千秋。煙霞峯半書堂在。慨想當年李鄴侯（鄴侯書院懷古）

磨磚作鏡亦奇哉。悟得禪機學道來。記取杜僧成佛處。蒼松翠竹繞亭台。（磨鏡台禪蹟）

南天雄踞幾時醒。翹首行來率舞亭。領略山僧煨芋味。懶殘遺跡此重經。（獅子巖率舞亭下啖芋）

絕頂來迎復日光。雲間燦爛吐朝陽。一丸紅漾清空裏。不負衝寒逐隊忙。（祝融峯觀日出）

遊興安四絕

口一（並序）

震白

三十一年五月二十四日。余奉命招待各界前往興安遊覽。遂得徧攬靈渠滄浪橋萬里橋秦堤飛來石三將軍墓及湘漓分派處（俗稱鐮嘴）伏波遺碑諸勝。歸就燈下草成四絕。

靈渠鐮嘴奪天工。萬里橋頭一水通。猶有多情堤上柳。長長短短舞東風。
頑石飛來問夙因。白楊古墓總傷神。萬年霸業嗟如瞬。獨有長堤猶號秦。
長堤如帶柳如煙。滿眼芳菲四月天。認取伏波三尺碣。千秋志業一碑傳。
海陽山色碧流涵。散黛浮青夢亦甘。啼鳩一聲春去也。漫天烟霧望江南。

口二（和顧祕書震白元韻）

書行

吾來附驥看名工。兩水湘灘一潤通。鞭石祖龍今在否。夕陽無語問山風。
頑石共云有夙因。新詩舊刻倍增神。由來勝地添蛇足。况復名都說自秦。
鄉關遍地滿烽烟。家祭何年欲問天。六代興亡曾轉瞬。古今一例碣碑傳。
深藍淺靄水光涵。茗飲清泉味亦甘。敢道眼前風景好。杏花春雨只江南。

口三（和前韻）

乃偉

頗疑技巧出神工。故使灘湘兩水通。憶昔來遊春正好。杏花香送酒旗風。
自古興亡有果因。滄桑經眼漫傷神。遙知嬴氏千秋業。只遣人譏二世秦。
幾家漁火一江烟。世外桃源別有天。名勝猶留陳跡在。殘碑斷碣盡堪傳。
夕陽挂影水中涵。照見浮鷗睡正甘。羨彼忘機能自適。不知風雨滿江南。

口四（和前韻）

秀餘

湘灘分派若天工。萬里源流一脈通。攬勝自憐塵鞅阻。臥遊無那負春風。種得千秋石上因。祖龍至竟枉勞神。中原遍地干戈起。尚有桃源好避秦。荒村遠樹挂炊烟。短碣摩挲欲暮天。幾度滄桑無限感。猶憑幽咽水聲傳。蘇碣江干倒影涵。遊蹤回味尙餘甘。清幽似隔紅塵外。小憩渾忘斗柄南。

口五（前韻）

禮文

湘灘分派出神工。從此興安水利通。短碣空留薪火絕。頓教末技慕歐風。石上三生未了因。長堤懷古倍傷神。雄心縱得兼天下。尙有魯連不帶秦。遠山暮靄接江烟。無限情懷別後天。分水嶺頭傾耳聽。至今依樣恨聲傳。萬里行軍壯膽涵。邊疆裹革死猶甘。伏波能得無生旨。尙有遺碑在越南。

沐社吟集卷十一

最難風雨故人來

口一

彥賓

徑僻梨花鎖。雲低護綠苔。茅檐猶浙瀝。叢楚驟喧豗。濁酒慵斟酌。
新詩待剪裁。催租宜可避。叩戶尙相猜。惻惻經年別。栖栖遠道來。
寒暄增感慨。議論雜俳詼。風雨神州痛。黍離故國哀。深談殊
不已。重訂菊花杯。

口二

甯僧

雨晦風蕭會。沈吟百念灰。方深孤客感。恰值故人來。舊夢鞭絲柳。
新痕屨齒苔。迷茫聊偃息。蕭瑟自徘徊。已分廬終老。何期徑又開。
素懷忘問訊。私喜轉疑猜。眼有三生石。心無半點埃。艱危吾

道在。濟世正需才。

口三

瑞滋

獨坐無聊甚。蕭蕭風雨哀。正期良友至。忽報故人來。倒屣迎三徑。傾樽飲幾杯。滄桑增感慨。雲樹共低回。雅興追金谷。吟情擬玉臺。相逢原邂逅。不住莫疑猜。燭更西窗剪。筵還北海開。忘形同一醉。屋漏亦悠哉。

口四

懷久

客懷正孤迥。秋水憶高軒。灑落追時敏。超奇抗稚存。詩情和竹嘯。畫意潤荷暄。舊雨歡今夕。傳杯與細論。

口五

用養

幽齋獨坐思迢遙。空谷傳音破寂寥。方訝荷聲聽別浦。遽看篔簹影渡

前橋。喜逢舊雨聯今雨。那惜花貂換敝貂。郊迥祇宜盤荐韭。巴山逸事話良宵。

口六

乃偉

夜來剪燭話連床。相對殷勤問短長。且喜君詩清可挹。定知吾道拙能藏。起衰無那頻看劍。遣興何妨一舉觴。更有別情堪慰處。至今不減少年狂。

口七

秀餘

蕭齋如晦拙無言。根觸離愁欲斷魂。剝喙喜君簞笠至。西窗重與罄清樽。迷濛烟水浪聲喧。一棹衝波忽到門。勾却離愁千萬斛。爲君撥火酒重溫。

口八

信侯

敲詩猶記夜牀聯。亂裏相逢動隔年。風雨一樓人對酒。不須劇飲已陶然。

口九

崇德

孤燈愁聽打窗聲。對影無聊百感生。犬吠出門迎遠客。開樽重與敘離情。

小橋流水

口一 調寄漢宮春

彥賓

幽勝重尋。正清溪垂柳，掩映東城。舊相逢處，欄邊小立俛停。看春雲如醉，按紫簫低和新聲。盈盈。一水臨分。軟語丁寧。堪歎馬卿寥落。負題橋壯志，百事無成。瘦影遲徊自。惜綠鬢星星。青衫紅粉，到如今。一樣飄零。縱有焦琴托意，更倩誰聽。

口二

用魯

綠草迷幽徑。溪聲欲過橋。臨流思漱石。對月合吹簫。柳外橫添檻。花飛急趁潮。遠看堪入畫。佳境倩誰描。

口三

甯僧

疎疎離落幾人家。衰柳殘陽噪暮鴉。罷釣漁竿孤影瘦。趁墟菜檐半肩斜。源通鄰浦潮初漲。路轉前村酒可賒。爲憶青溪風景好。相期來歲試新茶。

口四

禮文

架溪木石兩兩。行人渡得千千。此地別饒野趣。風來好送歸船。

口五

秀餘

清溪一曲映斜陽。半月橫波野趣長。疑是琴聲風拂處。靜聽忘却暮

山蒼。

口六

信侯

幾樹垂楊檻外栽。小橋一曲傍樓臺。連宵密雨添新漲。時有落花逐水來。

沐社吟集卷十二

送禮文遠行（乘機飛渝轉西北）

口一

乃偉

輕易辭家去。此行豈等閑。吟肩擔世事。任重不知艱。

口二

秀餘

欲憑詩句敘離情。把筆翻教寫不成。記取君爲霖雨日。出山猶是在山清。

口三

味辛

誰謂登天蜀道難。乘風真個上雲端。羨君挾策飛飛去。拭目同看萬里搏。

口四

劫剛

在昔張騫使西域。千載至今猶豔說。聞君壯志步先民。萬里飛淪轉西北。識君湘桂共扶輪。羨君狂俠亦溫文。迴雁峯前水深淺。那堪拍浪遊長鯨。一笑昂頭忽西顧。雲山烟水迢迢路。驕雲吐日大傘張。明日長亭送君去。西北今爲大後方。墾荒數化費周章。更搜奇蹟記風士。看君文字放光芒。吁嗟乎。人生遇合非無由。老驥伏櫪終懷羞。感蹉跎兮春復秋。曷不委身任去留。借濁醪醉倒天盡頭。

口五

信侯

壯志籌邊博望侯。客蹤曾此小勾留。交逢深處難爲別。人過中年易感秋。漫向江干歌折柳。還期砥柱挽狂流。料應旅邸尋詩句。風雨瀟湘憶舊遊。

口六 前意未盡再賦長歌贈之

前人

風雲變色毒龍舞。獸蹄鳥跡徧寰宇。六載已嘆金甌缺。進而喧賓欲奪主。畏友張子號禮文。獨具男兒好身手。健筆力能掃千軍。壯志直欲干牛斗。慷慨激昂投袂起。寶劍出匣寒光吐。立功天地尋常耳。餘子碌碌何足數。昔日豪情今已銷。祇爲五斗米折腰。五十餘年髮種種。食粟而已等曹交。願君客途時珍重。江湖天闊走風濤。我發狂歌壯君行。鵬搏萬里任扶搖。

口七 調歌頌

彥賓

洞庭飛木葉，衡浦雁迴汀。相逢盡是遷客，日日送人行。欲把花驄繫住，却惜蕭疎楊柳，無復舊青青。寫將離別意，幾度鷓鴣聲。湘妃竹，小喬墓，離騷經。文士美人芳草，處處忒關情。暮地吳鉤夜吼。催教鷄鳴起舞。萬里事長征。願借鸞鳳翼，相送上陪京。

口八

才毅

蜀道古稱難。層巒夾險灘。民勤誇富庶。地迴集衣冠。振翮青雲近。
揮戈落日殘。看君餘傲骨。庶不畏高寒。

口九

前人

一曲湘江水。常送別離人。往來多征客。湖海慣容身。文章真磊落。
肝胆益輪囷。秋風驚肅殺。鐵騎馳驅頻。騏驎伏櫪久。無時忘逐
塵。萬里酬壯志。驥首躋公卿。

口十

經綸

此行何異欲登天。鐵翼飛騰霄漢邊。更上西川到西域。爭如張說又
張鷟。詩才沐社無雙敵。文字衡中有夙緣。新月新秋新惜別。情懷
萬種入吟篇。

口十一

用魯

文酒相逢又別離。離懷不盡柳絲絲。壯行難贈黃金策。且送先生兩首詩。
忽唱驪歌意黯然。更無杯酒設離筵。長堤弱柳千條綠。底事花驄未許牽。

口十一

懷久

禮文兄將有遠行聞先詣白門賦此誌別

東歸豈是爲純鱸。萬里雲山覽壯圖。倩問臺城楊柳色。青青還似舊時無。

憶王孫

(別憶沐社同仁)

禮文

請纓豈爲覓封侯。願趁長風壯志酬。此日征帆天際流。思悠悠。回首瀟湘憶舊遊。

沐社吟集卷十三

梅訊

口一

用魯

消息傳何早。孤山鶴未知。冷香憐紙帳。淡豔降瑤池。索得巡檐笑。拈來倚笛吹。林家宜有婦。相對詠新詩。

口二

才毅

木葉皆黃落。傲霜松竹存。寒枝花吐蕊。疎影月移痕。泛玉添幽思。浮香動旅魂。可憐湖海客。依舊走侯門。

口三

超之

風雪漫天狂。蘆灰猶未揚。一枝高庾嶺。幾點醒瀟湘。剛骨挺疎影。

。素心含暗香。江南依舊好。萬樹望彭郎。

口四

君放

問梅消息近何如。賴有來鴻惠我書。庾嶺爭傳香已透。江城未復夢難輪。羞從鄧苑標新蕊。怕向西冷認故居。撫序漫談戀春早。衡廬極目邈愁余。

口五

甯僧

羅浮消息斷經年。獨遣關心到客邊。眷戀芳塵殘劫外。沉吟綺夢小春前。別來驛使還相問。寒去逋仙祇自憐。珍重湖山無限意。留將清福待纏綿。

口六

憲宣

見說孤山景物妍。最關情處綺窗前。一枝寄已江南草。十月開應嶺

上先。爲報名園春有主。定知飛雪色無邊。而今數到番風日。桃李花時遜隔年。

口七

乃偉

卻憶孤山處士家。暗香浮動影橫斜。而今消息江南杳。十月空餘嶺上花。芳心欲與春爭發。不待東風着力催。索笑巡檐誰可共。南枝數到北枝來。

口八

秀餘

風景江南繫我思。欣逢驛使話經時。探將鄧尉春消息。寒樹猶存舊日姿。

口九

平國

去年今日小陽春。庾嶺花開分外勻。今日嶺南春依舊。看花不是去

年人。

口十

石子

園林搖落九秋盡。疎影橫窗催我詩。寄語玄冥休着力。好教的礫綴花枝。

口十一（調寄東風第一枝）

彥賓

鄧尉芳塵。羅浮綺夢，拋却又還依戀。當年索笑巡檐，月影暗香相暝。流光似電。匆換了，花磚添綫。倩東風力挽玉車回，休教春歸獨先。上東閣蠟痕猶嫩，望孤山淒迷一片。阿誰短笛，臨流吹起，閒愁零亂。故國何在，算只有偷和淚嚥。夢中長是嶺南春。枝北枝南開徧。

口十二

健君

春歸經何處。疑在庭前樹。着意問寒梅。含情默不語。大陸門龍蛇。
湖山半焦土。吾民盡瑣尾。誰作春光主。願言掃虜氛。光復此夏
宇。同登熙春臺。共結遊春侶。巡檐索笑歡。寒香入詩句。守此歲
寒盟。長住梅花渚。

瀟湘烟雨

口一

用魯

一望瀟湘景。烟含宿雨時。迷離看曲岸。隱約障深池。渡口雲難撥
。山腰路易迷。遠峯衡岳峙。微露欲侵肌。

口二

君放

七二多雲氣。氤氳蘊太空。花光濃淡裏。山色有無中。兩岸如炊繞
。一江似霧籠。九疑浮翠靄。相望總濛濛。

口三

石子

百尺孤松潤露珠。漁樵背笠唱歸途。山村遠鎖湘妃竹。一幅米家撥墨圖。

口四

信侯

一片淒迷七二峯。悠然蕭寺送疏鐘。漁舟閒繫垂楊岸。處處樓臺烟雨封。

口五

才毅

南岳依稀霧氣融。江風無力送歸鴻。孤帆遠樹登樓望。都在蒼茫一色中。

泚社吟集卷十四

雪人

口一

君放

天外飛來不染塵。超然卓絕豈無因。團成玉屑供兒戲。洗盡鉛華見本真。肥遯相時行有素。滑稽翫世意常新。寒流一片人何往。聊借空花一現身。

口二

才毅

夜半動春雪。朔風帶雨來。敲窗聲款款。啓扉見皚皚。撒鹽成瑩晶。飛絮催早梅。凍鴉覓巢亂。羣犬踏痕回。披裘賞佳景。攜兒掃雪堆。臃腫形骸具。玲瓏笑顏開。冰肌澈玉骨。羊脂含鶴胎。婦孺皆環睹。墨客咸低徊。俄頃雲開處。偉軀漸消頹。一覺黃梁夢。遺蹤

入塵埃。對此傷搖落。不勝羈旅哀。

口三

乃偉

玉潔冰心不染塵。却從冷處見精神。去來休說無踪跡。流水飛花是此身。浮生莫作等閒觀。肯讓人憎骨相寒。不是吾腸難向熱。避炎正好夕陽殘。已經參透色中禪。冷眼觀人遍大千。可惜衆生每不悟。只應無語立風前。不問前程路短長。放閒老眼看炎涼。滄桑閱盡心雖冷。猶共春風鬥一場。

口四

味辛

任人調笑任人瞪。身自莊矜心自明。爲厭世情甘避熱。更從冷處識冰清。

口五

價候

悟徹浮生色是空。檐前長立語東風。大千冷眼都看徧。可惜無人
不熟中。

口六

甯僧

莫向炎場覓賞音。相投臭味恐難尋。本來世事何須說，只合無言冷
到心。

口七

志中

冰爲肌骨玉爲裝。傀儡登場惜不長。冷眼也知流熱淚。傷心無語泣
斜陽。

口八

用魯

素娥疑是漢宮娃。小謫紅塵未有家。來似落花去流水。身前身後絕
無瑕。

口九

石子

漫天飛絮壓梅枝。擁帚兒童樂不支。粧點居然誇碩腹。看他消受到何時。

圍爐閒話

口一

憲宣

山居迫隆冬。終日對岌葉。田間稍無事。來往恣遊狎。日落掩荆扉。開籠招鷄鴨。童子荷鋤歸。飛雪滿肩胛。入門撲蓑笠。瑟縮而疲乏。家人煨糶。環坐以權洽。對此新生意。頗思酒沽呷。開尊傾濁醪。園蔬手新搯。今年雨水時。倉倉同覆壓。昨日城中來。聞亦流兵甲。犬戎盡遁逃。小民蘇塵劫。東家新婦歸。珠翠滿頭插。見面道豐年。朱唇雙眉夾。語多雖雜亂。未忘農桑業。反思亂愁。白晝生恇怯。白首無所戀。但期守王法。坐久火無溫。斜月下山峽。

。呼兒歸去來。晨興理畚插。

口二

石子

臘鼓敲殘歲序更。熊羆獸炭會詩盟。半壺綠酒添吟興。一片銀沙映月明。太息炎涼原轉瞬。從知得失總浮名。傾談不覺東方白。尙有餘溫未解醒。

湘江大橋通車紀念

口一

乃偉

不是神功卽神助。湘江一變康莊路。長虹橫跨岸東西。從此行人不須渡。金梁千尺入雲端。應作南天鎖鑰看。負重而今能利濟。那知慘澹經營難。自古扶輪屬大雅。建設交通光華夏。車連軌接去復來。來似游龍去奔馬。萬里騰驥一瞬中。原憑人力奪天功。制敵先機

賴有此。肯讓健兒獨建功。

口二

彥賓

金梁千尺偃霓虹。鼉浮鰲立衡陽東。蒼波遠接九疑水。北走洞庭巴蜀通。八桂五嶺接車軫。三湘七澤連朦朧。鎖鑰東南開重鎮。大川利澤宜其功。一從屐寇陵夏宇。神京畿甸憑狐鼠。七年抗戰兀如山。四捷湘沅獨柢柱。連車方軌似游龍。挽粟飛芻備軍糈。鐵橋雲矗山邱重。坐鎮魚龍成四控。誰知鳩衆庀材時。倒拆天吳改紫鳳。願言重建舊山河。放歌預獻河清頌。

口三

味辛

大橋跨兩岸。要道扼三湘。自有長虹度。何須一葦航。國防資鎖鑰。商旅利康莊。會看飈輪駛。軍民喜欲狂。

口四

秀餘

橫江鐵鎖昔所聞。曾抗阿瞞百萬軍。河山帶礪苞桑固。制敵機先作計殷。金櫟聳立湘江畔。車軌接聯東西岸。溝通百粵與桂衡。師行何用望洋歎。朝發蒼梧夕荆襄。幾疑縮地有長房。誰知慘澹經營者。從此平添兩鬢霜。古視長江爲天塹。今人恃有交通便。佇看東南奏凱時。論功合讓斯橋先。

口五

才毅

望洋不復聞興嘆。兩岸今看一軌通。砥柱居然澄貝闕。金櫟直欲接蒼穹。飛芻挽粟資羣力。鑿石開山見鉅工。從此衡陽添一景。雁峯夕照映長虹。

口六

信侯

湘江界劃東西岸。西頻湘桂東粵漢。東西兩岸遙相望。賴有便橋通一貫。年年潮水捲地來。幾度量梁告中斷。欲行行不得。望洋徒興

歎。正橋觀厥成。無復畏汎濫。一勞求永逸。功倍事乃半。寒流橫枕勢如龍。八桂三湘一旦通。昔日臨淵今坦蕩。全憑人力奪天工。從今聯運膺重任。萬里奔騰轉眼中。

□七湘江便橋（調寄惜分飛）

懷久

衡浦東西相望處。接軫如龍穩渡。減却行程阻。一身嘗遍風濤苦。饋轉頻年勞記取。曾作中流砥柱。後起才堪許。從今閒共漁舟侶。

泚社吟集卷十五

雜詠

口一 春草

乃偉

滿城亂綠漲如烟。附壁綠籬欲上天。應悔掘根終未盡。早知滋蔓總爭妍。去年見說經霜萎。今日仍驕得雨鮮。一自踏青過舊侶。居然染豔到裙邊。東風報道入邊關。一夕河山改素顏。芳訊不曾來日下。幽姿已自遍田間。隔牆蜂蝶狂無賴。舊院笙歌興未刪。眼看秋來生意盡。美人解唱大刀鐮。處處平蕪碧似紗。傷心誰復問桑麻。新根匝地鋤還茁。繁綠連天恨總賒。腐後化螢猶有燄。舊時歸燕已無家。謝娘池館餘蒼莽。空對流光戀物華。四山彌望盛蓬蓬。雨露終歸造物功。本意留青容護砌。那知長刺反爲叢。香閨不作繁華夢。紫陌空來澹蕩風。無限闌珊花事感。當年桃李滿園東。

口二 新柳

前人

宜烟宜雨挹香塵。初轉陽和嫩柳新。眉語通波仍脈脈。腰支入畫想
真真。迎來桃葉二篇水。占得梅花一縷春。欲露金心還斂笑。慵開
青眼盼行人。昨夜輕寒昨夜風。紅情綠意有無中。淡抽翠黛痕
猶淺。初揚黃庭寫未工。綺陌凝粧春正懶。雕鞍試馬雪方融。煦和
却待濃陰滿。贏得東皇風露功。

口二 憶秦淮（首尾限字體）

甯僧

以雨絲風片煙波畫船八字分嵌八句之首韻脚以溪西雞齊啼
五字押之

雨花臺畔訪青溪。絲鬢香塵水閣西。風候非秋偏鬥蟀。片時宜夜却
聞雞。烟籠淺碧擎空直。波卷輕紅拍岸齊。畫槳雙飛人半醉。船窗

笑語似鶯啼。

口四 前題

乃偉

雨後停驂過小溪。絲鞭影掛夕陽西。風懷減盡憐莊蝶。片羽炫餘嘆季鷄。煙樹欲隨雲樹渺。波光常共鈿光齊。畫堂舊燕思王謝。船外喃喃歎又啼。

口五 端節有感

用魯

粉團角黍任人忙。自搗菖蒲自舉觴。醉裏呼童懸艾虎。却忘萍跡在他鄉。

口六 有贈

禮文

驕陽似火竟無涯。侷促常教氣不華。河漢曾看成涸轍。園林幾見有完花。沾襟血淚如斑竹。滿目瘡痍痛亂麻。莫補蒼生寧淡泊。南針

慎勿一毫差。休慚曳尾匿枯塘。卞璧猶當韞匱藏。涇渭同流分淨濁。松筠自古傲冰霜。一瓢陋巷寧枵腹。三疊陽關莫斷腸。耿耿此心知未泯。不教同輩擅孤芳。

口七 感懷簡禮文

秀餘

丈夫志氣欲凌雲。學貫天人究典墳。冀挽狂瀾憑隻手。安能鬱鬱事詩文。嶙峋傲骨難諧俗。抱璞誰珍卞氏玉。不爲良相爲詩人。到處揶揄遭垢辱。憂憤靈均世所知。離騷一部半微詞。可憐李杜稱詩聖。生不逢辰萬古悲。頻年烽火連郊甸。恥學終童求自見。寧負昂藏七尺軀。任令捐棄同秋扇。莫笑寒蟬噤不鳴。全身競自守硜硜。攬槍天末何時隱。開甕與君角酒兵。

口八 難民行

前人

海內洶洶如鼎沸。殺人盈野渾閑事。聞道今年歲有秋。孰料哀鴻猶

遍地。白叟黃童扶挈行。鳩形鵠面髮鬢。可憐佇向路隅泣。腹枵
爭鬻抱中嬰。自云本是江南產。流亡血恨鏤心版。遭逢容我與君言
。祇恐君應爲裂睥。家隔敵人水一方。烽烟不避插新秧。儲糧爲國
供軍用。肯效居奇暗屯藏。連營刀斗聲寂寂。暫放寶刀學貨殖。腰
纏萬貫上揚州。日事徵歌兼選色。遺風猶復見陸羊。大度雍容藥先
嘗。醜虜狡焉忽思逞。聞風潰退何倉皇。罔顧軍資委阡陌。成羣結
隊走鄉僻。搜羅比戶盡鎔銖。誰憫黃臺瓜屢摘。精龕靡擇任兼收。
一閔紛紛去不留。剩得空城旬日後。纔聞敵騎到荒陬。堂堂身是炎
黃胄。屈節寧能事仇寇。忍痛攜家別故園。艱危幾次瀕傾覆。重提
往事劇心酸。今日方知世路難。滿目瘡痍誰則問。敢尤老幼苦饑寒
。夙願從戎拚一死。微名尙得傳青史。激流翻恐誤岐途。負國殃民
吾所恥。我聞前事已悲傷。又聽斯言更徬徨。爲獻輶軒供採擇。不
辭寫作難民行。

口九 哀時吟

懷久

東來兵氣連雲屯。錦繡江山染劫痕。扶桑島國原同種。車書遵化亦同根。蓄志陰以鄰爲壑。洪濤十丈一時掀。殺機驟開勢難遏。喚起神州炎胃魂。義師奮舉當強寇。蘆溝秋月正黃昏。重關烽火驚深入。壁壘堅持民意惇。室廬灰燼田園廢。從軍誓向敵追奔。孔道通都已淪陷。還仗遊擊遍鄉村。凜茲風雨同舟日。救亡主義三民尊。喪心最是事仇者。遑計貽羞祖若孫。與虎謀皮徒取辱。矯情幾見久彌敦。味良更有奸商輩。傾將讎貨進私門。養生粟帛翻騰貴。編戶艱謀飽與溫。征途喘息流民屬。乞得朝饔待夕飧。市肆殷闐忽墟落。歡場無復酒盈樽。嗟哉世變抑何亟。頻看弱肉恣鯨吞。歐西亞東正相似。血債疊疊奚暇論。吾聞得道終多助。茫茫此意叩乾坤。

口十 讀彥賓勞歌集賦贈一律

前人

信手拈來絕妙詞。含風茹雅兩兼之。筆花每共心花發。神采還隨藻采馳。庾子江關原賦恨。杜陵蜀道總傷離。勞歌一集人爭誦。想見騷壇獨步時。

口十一 麀詩三疊（並補誌）

禮文

彥賓有勞歌集詩一卷。懷久曾用支韻詞之馳離時賦七律一首爲贈。秀餘見之。依韻和作。主人疊韻相答。而秀餘意有未盡。再疊以酬。於是更番麀戰。累數十首。同仁見者。咸以詩思捷健。旂鼓相當。歎爲觀止。顧兩君意氣飛揚。各不相下。余見獵技癢。亦戲成三章。一以題勞歌集贈彥賓。一以壽秀餘五十華誕。一以柬兩君爲之解紛。今凌鄭兩君麀詩原稿已付劫灰。惜哉。

一卷勞歌意勝詞。每回諷誦每欽之。胸中錦繡如星燦。腕底龍蛇似電馳。志鬱詩思何乙乙。心憂世事亦離離。間從逸句吾神往。恍與

襄陽夢見時。

介壽稱觴祝嘏詞。頌猶陵阜九如之。鶴齡每共功

勛長

秀餘兼職線區司令部
時適晉升調度科科长

鳳管能隨意緒馳。寡過學符遽伯玉。長生術秉

漢鍾離。筵開玳瑁羣仙醉。天上人間齊慶時。

秀餘七夕
後四日誕

壁上從觀晉一詞。縱橫筆陣欲何之。尖叉門韻由來險。聲譽塵詩早已馳。孰究爭端分曲直。誰爲戎首總迷離。解紛記取敦槃。正是雁峯月上時。

口十一 五十初度述懷

秀餘

學書學劍兩無成。五十星霜轉眼更。恩怨漸隨芳靄淡。功名不羨錦衣榮。半生事業餘詩卷。此日情懷付酒罍。天寶宮人頭已白。却教留與話昇平。

秀餘五十述懷一詩。沐社社友多疊均爲壽。秀餘復分別疊均答謝。合之總得五十疊。適與其壽齡之數相符。亦吾沐社之韻事

也。惜原稿已付劫灰。而秀餘亦已作古。每念斯人。可勝黯然。今於書篋中檢得秀餘原唱。爰爲列入付梓。藉以寄哀悼故人之思。

禮文跋

口十三

金縷曲

五十自述同羅劬剛作卽依原韻

秀餘

我亦知非矣。正瀛寰，版圖變色，血填滄海。人世南柯原一夢，都付浮雲逝水。算賸得吟懷難改。極目鄉關何處是，更年年，流浪何時已。我欲去，拂衣起。才高八斗徒然耳。歎炊桐，中郎莫遇，空餘焦尾。試向北邙抬望眼，多少成仁國士。有多少名留青史。因羨耕雲雨犁輩，反輸他，長樂湖山美。榮和辱，不關已。

民國卅三年。予在桂林。春日秀餘自柳州過訪。出示此詞。相與盤桓商略。盡漏罄酒。秋間避寇。猶邂逅黔桂道中。幾度把盞。良慰飄零。予旣抵渝。忽傳噩耗。遂判人天。愴懷曷已。

此作高唱入雲。何意竟成絕筆。因背錄付刊。公諸同好。並誌悼思。

羽書跋

口十四 觀弈

乃偉

黑白爭持一着先。縱橫抵死誓攻堅。觀棋最怕臨殘局。滿目瘡痍劫萬千。

口十五 疊和厚盒深秋有感

彥賓

萬籟鳴空客思多。西風黃葉洞庭波。髮隨秋草行將盡。身等寒匏空復皤。詩到亂離傷杜甫。酒餘哀樂泣荆軻。撥愁愛誦潘郎句。難得閒居獨放歌。

口十六 厚盒見示一律語多傷感疊韻慰之

前人

媚世羞爲媚嬖姿。學荒毒得性靈詩。名心早悟成虛幻。禪寂難空是

愛癡。偶涉幽林尋逸趣。閑斟清酒趁芳時。樂天自覺隨緣住。漫作秋蟬泣抱枝。

口十七 東社友王憲宣

前人

欣承青鳥寄瑤箋。客裏歡聯翰墨緣。身爲多愁常病酒。詩能引玉且拋磚。山河未復期吾輩。風雨同舟憶往年。料得班荆重道故。舉杯相看兩華顛。

口十八 讀信侯于喁吟詩草有感

少選

往事如烟迹已銷。敢誇豪氣尙凌霄。中年早豁昌黎齒。何日方舒靖節腰。賴子香醪澆塊壘。讓他繁艷競嬌嬈。試看多少臨風樹。畢竟蒼松最後凋。

口十九 和前韻

秀餘

浪跡頻年壯志銷。鵬搏不復羨雲霄。看人漸懶舒青眼。試帶纔知減素腰。最可養生惟醉夢。何妨媚世學妖嬈。窮通修短都成幻。弱草寒松一例凋。

口二十一 讀信侯于喁吟詩草感有一律

懷久

子建才頑道貌臞。琳琅積稿唱于喁。清懷豈合迂儒笑。末俗端資大雅扶。愧我班門偏弄斧。多君南郭許吹竽。湘濱恨結詩盟晚。十載蹉跎學步趨。

口二十一 衡陽偶感

乃偉

已覺閒愁消不盡。那堪憂患日相催。十千莖雪蕭蕭白。一片冰心寸寸灰。濟世懷才餘涕淚。望鄉思雁獨徘徊。十年劫火天涯路。展轉流離最可哀。

口二十一 采桑子(寒夜有感)

秀餘

客窗淒絕衾如鐵，爐火無溫。凍雨聲喧。臥對寒燈欲斷魂。誰教未遂封侯願，末路王孫。往事何言。認取南柯舊夢痕。

口二十二 寒夜吟

用魯

朔風凜冽侵我床。譙鼓頻催夜未央。衾裯寒凍如潑水。欲寐不得殊徬徨。胡爲不寐夜偏長。攬衣曳履下高堂。月明地白一燈暗。雲飛雁鳴滿天霜。我聞雁鳴有所思。嗸嗸飛去奚所之。人生勞碌與君似。歷盡風霜謀一枝。

口二十四 浪淘沙（歲暮感懷）

懷久

門外雪霏霏。寒透征衣。又驚爆竹歲年催。顧我書生呵凍筆，心事空違。萬里雁音稀。客夢時飛。江山終許見重暉。耐得萍飄滋味永，肯負襟期。

口二十五 讀史

乃偉

忍使高堂入釜烹。居然猶說欲分羹。英雄肝膽原如此。且勸重瞳莫與京。一命其如九鼎尊。杯羹何忍說分吞。傷心應悔生兒誤。不念劬勞父母恩。

口二十六 憶金陵

前人

往事六朝費討探。無邊風月說江南。卽今烽火連天迫。庾信鄉心百不堪。隔江無夜不徵歌。畫舫秦淮商女多。只見南朝金粉好。誰將興廢問山河。未到陸沉事豈休。如何輕易失神州。猶堪一戰背城借。洗淨降旛污石頭。

口二十七 謝友饋鹹魚

彥賓

厭餐藜藿故人憐。千里鯨魚不論錢。遠饋尙疑藏尺素。分廉翻喜致

三鱧。嘗寵顧笑指先動。封鮪還開口欲涎。久歷兵塵鄉夢斷。珠江烟雨憶漁船。

口二十八 三摩耶室卽景聯句

禮文賓

雨洗苔階碧。(凌)朋來屐印微。(張)茶烟詩意淡。(凌)相對語依依。
。(張)雲罅射晴暉。(張)平林似醉緋。(凌)澄潭涵倒影。(凌)掩映
入柴扉。(張)瞬息晴陰換。(凌)殘陽屋角收。(張)橘青凝暮色。
(凌)涼氣迫新秋。(張)相攜入室坐。(凌)得句共推敲。(張)幽險歌
山鬼(凌)詼諧答客嘲。(張)舉首見麻鞋。(張)屋梁挂作排。(凌)翻
疑唐杜甫。(張)朝闕待君偕。(凌)茗話膏環脆。(凌)貪饕笑獨餐。
(張)孟公忘主客。(凌)洒脫足清歡。(張)樂只調琴瑟。(凌)老萊有
逸妻。(凌)兵塵千里隔。(張)至竟得重攜。(張)談笑有嘉賓。
(張)高歌動四隣。(凌)歡娛忘漏永(張)北斗挂城闌。(凌)

口二十九 追悼崑崙關陣亡將士

禮文

欲掃倭夷報國恩。孤忠義憤震乾坤。英魂絕塞千秋在。正氣雄關萬古存。堪歎蓑弘竟化碧。更悲先軫不歸元。人生如夢誰無死。留取丹青弈世尊。

口三十 題馬景安攝影冊

前人

景安信絕倫。攝影化工臻。芥子須彌納。廬山面目真。錦冊重披日。湖山不忍看。腥羶誰共滌。慷慨髮衝冠。

口三十一 題照

信侯

奔走風塵二十年。贏來白髮上華顛。鹽車久已悲轅下。不受人憐亦自憐。認取廬山面目真。蘇秦還是舊蘇秦。管城今日留鴻爪。萬里烽烟客裏身。

口三十一 自題小照

用魯

看來一樣君同我。真假何曾彼此分。誰憫斯人獨憔悴。相逢惟我與殷勤。我原落落無知己。君亦寥寥未肯羣。同病至今能有幾。君應憐我憐君。

口三十二 題歐陽竟無居士法照

禮文

維摩居士具相好。自有摩尼無價寶。六大體同等佛生。四身法爾離作造。卽渠卽我莫猜疑。是幻是真可探討。漫云有相皆虛妄。當相原來卽大道。

口三十四 題張季直楷書長恨歌

懷久

抒情敘事並稱工。歌詠香山溯國風。更喜簪花留妙格。黃庭初寫學南通。

口三十五 用魯以真金集詩稿見示題贈一絕 前人

嶺嶠清才萃一門。妙詞君更擅西崑。亦園未許窺全豹。張君籍廣東其家有亦園一門風雅
且喜真金舊價存。

口三十六 讀彥賓勞歌集後感贈四律以誌景仰 君放

秋意上疏林。登樓感不禁。名山誰與語。空谷孰傳音。天末涼風薄。
江頭夕照深。蓼花紅似火。捲地作龍吟。

龍光騰廣野。矯矯御天颿。言訪三山秀。寧辭五嶺遙。風翻南海浪。
聲咽大江潮。漱玉飛香古。流暉亘碧霄。

凌漢發清商。高歌傲夕陽。從知勞者樂。不亞楚生狂。越秀傳聲大。
羅浮攬勝長。芙蓉開九面。新雁共迴翔。

余有亡羊嘆。希追駟馬風。浮光驚露白。掠影怍霞紅。意淡三秋柳。

情稠兩岸楓。衡雲欣接席。臭味與君同。

口三十七 次金城江感事

前人

觸自河山淚欲枯。淒然芳草滿庭蕪。分明一幅天孫錦。化作流亡轉徙圖。

王子君放。於詩具素養。尤長五律。以三十三年湘桂黔戰事。病歿於西撤途中。知者莫不悼惜。余抵渝後。其哲嗣光焰來訪。爲言乃父次金城江時。有感事一絕。及疾革。令光焰先行。口占一絕。得兩句曰。輕陰漠漠雨濛濛。人在流離顛沛中。以下不克續吟。竟與子永別。悲夫。余以斯作殆其絕筆。爰併錄篇中。藉誌傷痛。

懷久跋

口三十八

掃花遊

題震白西征吟雁詩集

羽霽

關山萬里，似戍客遙征。漸迷歸路。清秋易暮。又平沙一片，曉笳

如訴。滿眼荒寒，禁得聲聲淒楚。起凝佇。儘目送飛鴻，好音無據。
挑燈還自賦。有南國詩人，感深禾黍。喉津偶駐。只蘆花少解
，激昂情緒。抱憤書空，同是天涯倦羽。漫吟苦。且安排，凱旋樽
俎。

口三十九

深蘭香

重慶重午依夢
窗淮安重午韻

(並序)

羽 霽

甲申重午。寇薄衡陽。桂林告警。越日。予西走柳州。旋由宜
山而獨山而貴陽。止於重慶。蓋已歲暮。不謂勝利在望。而名
城迭陷。廬舍爲墟。流亡載道。慘事正多。今者。江南故鄉淪
陷區人士。因盟機轟炸。想亦正在疲於奔命之中。顧以餘生。
忽周星歲。對茲佳節。緬懷舊遊。悵然賦此。

星移序換，物異人非，世事何曾夢覺。行蹤似絮，胡騎如麻，誤盡
舊盟新約。問誰家，娥媚紅榴，偷倚頽垣尙萼。悵望江南，幾處猶
懸蒲弱。漫想清波競渡，畫舫笙歌，蕩情柔魄。山城霧斂，草院

風薰，解意景雲輕幕。撫良辰，重慶餘生，聊自長吟淺酌。况更有
，弄影鰲蟾，窺人牆角。

口四十

澡蘭香

次羽霄重慶
重午元韻

懷久

三湘霧慘，八桂雲愁，斷梗心情自覺。征塵未浣，旅夢頻飛，故舊
總虛期約。忍空懷，照眼榴花，煥映紅苞翠萼。點綴風光，剪取西
川芳蕞。漫道招魂楚些，話到流亡，萬千冤魄。胡笳絕響，漢幟
重輝，大計正參帷幕。待來年，返旆南都，相與蒲觴快酌。且細聽
，凱唱新聲，樓船銀角。

口四十一

金縷曲

題懷久戲作雛鳳
清聲說部

羽霄

獨酌瀘州釀。對新編，清聲雛鳳，情文堪賞。事業姻緣皆美滿。要
算風流跌宕。况更有佳兒英爽。信手拈來成妙諦，把人間缺憾都彌

償。遊戲也，慨當慷。空凋綠髮三千丈。正天涯，年年共感，征
鞞流浪。搔首沉吟何限恨，苦憶鶯飛草長。但願得旌旗增壯。大抵
浮生皆若夢，漫牢愁，萬種觀須曠。君不見，朝噉上。

口四十一 聞日本投降率成四首

乃偉

盟師直東指。窮寇遽心驚。困獸猶思鬥。負嵎借背城。羣情齊怨楚。
。天意欲收兵。黷武成何事。終教國自傾。
禍結十年久。生偷百劫餘。積愁惟縱酒。孤憤欲焚書。本是驚弓鳥。
。又成漏網魚。還鄉知有望。悲喜感何如。
且看人中霸。今爲階下囚。野心殊未已。壯志却難酬。烽火全球息。
。干戈四海收。彼蒼如厭亂。餘燼起無由。
原子顯神威。來從天外飛。降魔憑妙法。制敵發先機。萬象隨緣看。
。衆生一劫歸。可憐餘片土。誰復認依稀。

口四十二 聞日本投降喜賦

信侯

聞道倭奴請罷兵。漢旌輝映受降城。兩聲霹靂驚原子。百戰功勳歷上京。夢裏猶傳收薊北。客途且喜免長征。邊關十載馮唐老。一唱刀鐙感慨生。

口四十四 抗戰勝利送樹德先生東歸接收交通

懷久

凱歌聲裏看翱翔。歷歷河山百戰場。舊軌千程欣綰轂。嘉猷盼早慰思鄉。

口四十五 樹德先生屬繪秋風吟勝圖卽呈一章

羽儀

凱歌洽奏共盟邦。暴力終難逞虎狼。錦繡山河還禹甸。繁華歲月夢扶桑。危時每記勞籌策。盛業今看復軌航。好趁秋風吟勝日。與君快舉太平觴。

沐社吟集附卷一

秋心唱和集

原唱

應震白

落葉飄飄身世憂。霜風捲地怕登樓。一聲鐃角孤鴻淚。百戰河山雙
鬢秋。漫道衣冠成左袵。尙餘肝胆賦同仇。頻年數盡歸帆影。悵望
銀河天際流。涼颿陣陣撲簾旌。獨倚高樓看月明。不盡長風吹客
鬢。無邊落木瀉秋聲。祇愁玉壘變今古。豈有銀河洗甲兵。消息問
天還自問。君平未解卜前程。太息年來世變深。風高一雁落霜潯
。荒榛不盡銅駝恨。殘榭難伸老驥心。佈地碧梧篩月影。穿簾黃葉
逗蛩吟。客遊到此真成夢。往事如烟何處尋。孤舟兩繫老榕枝。
猶是殘棋急劫時。世味漸隨詩味淡。旅懷每共酒懷癡。海雲東指兵

氛惡。江雁西來鄉信遲。長願青燈依膝下。尊前撥箸數歸期。

口王凝生和作

江南悵望總多憂。說甚題詩舊酒樓。十里湖光孤棹晚。一聲雁語四山秋。天於殘客將奚慰。月與愁人若有仇。七載飄零頭似雪。蕭然注目水東流。斜陽無語下簾旌。又作秋光分外明。落葉已非前度影。鳴蟲猶帶故鄉聲。休疑白首還求食。所願蒼天早厭兵。巴峽穿從巫峽去。少陵當日本兼程。愁緒量秋孰淺深。秋來一夢落江潯。榮枯未必天無意。圓缺何曾月有心。百載興亡猶逝影。千場冷暖自沉吟。欲知人海滄桑事。好向沙鷗眼底尋。黃花不是去年枝。莫對黃花話舊時。閱世空餘雙鬢短。憂天未合一心癡。縱邀美眷如何補。及悟前非惜已遲。猿鶴山中休笑我。肯教晚節負初期。

口鄭秀餘和作

難將詩句寫幽憂。日暮西風獨倚樓。四處蛩聲吟夜月。一行雁影唳清秋。傷心每掬新亭淚。切齒思殲不世仇。漫笑黃花籬下寄。猶餘瘦骨傲時流。搖搖心正似懸旌。底事清光分外明。落葉空山森樹影。擣衣隔岸度砧聲。寧知作賦廋開府。肯效窮途阮步兵。鱸鱖初肥村釀熟。烽煙無柰阻行程。仰視明河夜已深。萍飄猶傍楚江潯。滿庭冷月縈離緒。遍地悲笳感客心。懶向桃源謀息影。忍教澤畔苦行吟。寒枝晚節經霜好。共汝南山載酒尋。聞說殘蟬過別枝。曳聲尙復弄當時。輪囷聚象俄成幻。冷豔浮香亦自癡。爲愛疏籬如靖節。故治老圃學樊遲。丹楓照眼添秋色。莫負家園歸隱期。

口葉乃偉和作

不見昇平總杞憂。年年作客感登樓。得邀明月消長夜。且共黃花傲此秋。世故飽經心轉淡。人情閱盡眼無仇。滄江一臥吟邊老。投袂

何時挽倒流。儘多月色照行旌。不似吾州一樣明。遊子鄉心秋雁影。騷人天籟夜蛩聲。寧辭五斗甘文丐。拚醉千觴鬥酒兵。消息家園楓菊好。頻年浪跡誤歸程。神州百劫寇方深。避地來居楚水潯。儘有瘡痍留滿目。無多草木亦驚心。傷時誰解長沙哭。去國寧忘屈子吟。大好河山餘燼在。桃源何處渺難尋。挾有凌霜筆一枝。才名早已負當時。能爲义手庭筠捷。不作嘔心長吉癡。得句每勞魚寄遠。傳書祇恐雁來遲。江南秋老莼鱸美。相約歸遊又失期。

口凌彥賓和作

側身天地餘霜鬢。塞雁橫空笛倚樓。野鶴性慵仍戒露。井梧骨瘦獨知秋。寒砧搗碎千閨夢。畫角哀號九世仇。鯨浪夜掀淪赤縣。恨難一簣障狂流。鄉心萬里鮑懸旌。涼夜何其不肯明。世慮難爲吹馬耳。雄心翻喜聽鷄聲。摧殘蟻夢因茶戰。降服詩魔仗酒兵。好是盟

軍紛捷報。預將歸計數郵程。鑿險椎幽韻味深。詩懷澄月印寒潭。
遙知得句幾叉手。應笑效顰長捧心。塞雁銜蘆常自警。枯蟬抱樹
賸微吟。劇憐旅思難成夢。往事悠悠作夢尋。功名夢寄大槐枝。
笑指黃梁正熟時。懶向鷄蟲爭得失。任呼牛馬作頑癡。心隨秋雁歸
程急。目斷征鴻鄉信遲。何日雲山珠海畔。茱萸插鬢拜安期。

粵俗重陽掃墓順
遊鄭安期仙祠

口凌昨非和作

落木蕭蕭逐客憂。萬方多難漫登樓。邊城兵氣傳寒柝。暮苑砧聲報
晚秋。海國鷄蟲爭得失。神州黎庶共恩仇。羈人莫遂還家願。悵望
長江日夜流。金風嫋嫋動高旌。楓葉蓼花照眼明。祇爲寒蛩驚客
夢。豈因童子賦秋聲。長懷家國悲身世。大好河山苦甲兵。未必
窮通關運命。英雄遲暮問前程。世變應知感慨深。梅村書劍走江

薄。七年遁跡羈臣淚。萬里思歸遊子心。猶有文章聯舊雨。漫將憂
價瀉新吟。知君得報堂萱茂。好把天倫樂事尋。孤鴻縹緲寄榕枝
。柰此沙蟲急劫時。投筆人從大漠去。望雲我對故山癡。文章亂世
知何補。哀樂中年悟未遲。漫向家園問消息。燕然勒後是歸期。

口曹信侯和作

家國漂搖羈客憂。年年王粲倚層樓。關山迢遞蘼鱸夢。風雨淒涼蘆
荻秋。籬菊相看憐共瘦。吳鉤屢拂感同仇。鷓鴣自有凌雲志。肯向
蓼江飲濁流。西風蕭瑟動心恹。兩岸霜楓照眼明。水底雲開留雁
字。林端日暮噪鴉聲。時逢搖落難爲客。况值潢池正弄兵。恢復神
州指顧耳。征途日日卜歸程。重陽已過感秋深。逐客重來湘水潯
。漫向亂離悲世運。好從剝復覓天心。梧桐庭院幽蟲語。風雨樓臺
野鳥吟。往昔繁華何處是。一番惆悵一追尋。楊柳成陰花滿枝。

綠嬌紅媚憶當時。心隨飛絮愁難盡。性喜銜杯醉不癡。風雨一江回
櫂晚。干戈遍地寓書遲。菟裘營就知何日。君問歸期未有期。

口崔雁冰和作

在望中原家國憂。已非吾土莫登樓。

用劉改之登多景樓詩
中原在望莫登樓句意

雲浮殺氣千山

黯。風送笳聲萬重秋。忍見九州淪異域。拚將三戶復深仇。天荒地
老無窮恨。併付寒江日夜流。

六年不見漢家旌。西望關山月倍明。繞野青燐聞鬼哭。辭林黃葉釀
秋聲。兒童強學鮮卑語。父老羞迎回紇兵。漫道收京日漸近。且從
旅雁問歸程。

遊子逢秋感慨深。怕聞寒雁下江潯。五更夢落思親淚。萬里蓬飛醉
客心。白首窮經同鼠腐。青氈作賦等蟲吟。劇憐亂世文章賤。何苦
生涯紙裏尋。

震兄在桂潛心著述往歲革新集成予曾以枉拋心力撰新語豈有文章補世
勦句貽之冀其少休乃近復有一得集新人生論等行世蠹魚生涯樂之不疲

畸人也

鷓寄江濱仍一枝

亂後余仍寓滬鷓寄廬八年前與震兄同居處也

秋來多病復哀時。恥沾雨露自成

傲。垂敝衣冠人笑癡。未惹腥羶同景略。爲留面目見邱遲。祇憐火色鳶肩久。况值山薇欲盡期。

口王懷久和作

未拋塵俗且忘憂。挹爽間登雁字樓。半面雲山沉夕照。中天月窟透涼秋。蒹葭不盡懷人意。磨礪同深辱國仇。翹首鷹揚東土日。蕭蕭落木枕橫流。塞外孤鴻望漢旌。歲週十二記分明。霜侵楓葉愁無語。血濺蘆花恨有聲。自古交鄰原尙德。於今却敵必先兵。何當掃穴犁庭去。秋水長天並邁程。金風襲袂又秋深。五載羈棲湘水潯。戎馬未休添客感。純鱸久闊動鄉心。漫勞青鳥頻傳訊。且對黃花一放吟。耐得萍飄滋味永。家山指顧好重尋。可有江郎筆一枝。

萬將心曲亂離時。世情怕着隨流濁。生事渾疑說夢癡。簷雨滴殘人
寂寂。燈花挑盡漏遲遲。賡歌不覺秋光老。祇爲催租屢後期。

口鄭君實和作

攬轡常懷斯世憂。感時王粲賦登樓。風雲莽莽山河老。鼓角聲聲天
地秋。欲掃胡塵思將士。終存漢朔復讎仇。故園夢斷無消息。檻外
長江日夜流。重重愁思繞心旌。銀漢無聲月不明。萬里鄉關羈客
夢。千家砧杵擣衣聲。苦吟每憶杜工部。痛哭常懷阮步兵。最是巴
山風雨夜。那堪默默數歸程。霜滿塔除秋漸深。晴空雁影掠江潯
。蓴鱸落落思歸意。松菊搖搖繫素心。芳訊忽傳青鳥使。新詩翻作
老龍吟。幽棲欲訪高人躡。煙水蒼茫何處尋。東籬初綻菊盈枝。
恰是蜚寒蝶瘦時。飛鳥已知人意倦。歸鴻寧識客心癡。煙浮老圃花
容澹。風靜遙山葉落遲。愛惜秋光無限好。願留晚節永心期。

口張心矩和作

不知老至樂忘憂。露滴寒花醉酒樓。萬里雲濤黃葉地。四山楓火赤
山秋。經窮白首家。遠累。懷抱丹心國構仇。何日王師牧薊北。側身
西望水東流。三邊無復動危旌。北雁南飛塞月明。隱隱帷燈開劍
匣。淒淒風雨聽笳聲。廟堂自有紆籌策。紙上何須妄論兵。痛飲明
年秋釀熟。蕭蕭班馬議歸程。琵琶唱罷獨情深。司馬當年久謫潯
。轉燭浮萍嗟世慮。斜陽無語慰秋心。儘多蒼翠山添色。亦有琳琅
客苦吟。靄靄白雲深淺處。予懷渺渺此中尋。飛舞龍蛇筆一枝。
風流文采憶當時。參軍俊逸稱詩伯。處士佯狂號虎癡。衡嶽天高情
戀戀。邯鄲道阻步遲遲。紫山村裏文華訊。可許摩挲訂後期。

口羅劫剛和

一辭誰云解百憂。幾番惆悵最高樓。山從畫裏添紅葉。雁向風前寫

素秋。亂世驅人隨燭轉。征旗同指共天仇。腥氈所至如能洗。願挽銀河不許流。聞鷄振袂卷簾旌。斗大星光照眼明。長夜漫漫開曙色。悲秋唧唧證蟲聲。已非觀弈同柯爛。莫羨籌邊善將兵。我有澆愁杯在手。不煩詹尹指前程。黃葉紛紛疊徑深。白楊無語冷江潯。空傳衡嶽回南雁。坐對楓林悟道心。攬髻有霜侵老態。盪胸何處不狂吟。湖山迢遞啼痕遍。回憶分明未忍尋。誰引高吭唱竹枝。亂離偏在野黃時。已知世味寧辭苦。更欲街頭學賣癡。腕底浪翻驚墨湧。眉端醉壓舉杯遲。偶然一拂焦桐尾。不信人間有子期。

口汪味辛和作

劫後餘生感百憂。瀟瀟風雨獨登樓。禪機未透腸先斷。客夢方醒鬢已秋。落葉無心隨冷暖。寒蟬何意訴恩仇。年來志氣消磨盡。愧負韶光似水流。無端鄉思似懸旌。千里空辜月共明。攬鏡欲簪驚鬢

影。牽幃無寐快蟲聲。迴峯每羨新來雁。薄袷誰憐遠戍兵。可恨年年留客屐。秋風未許卜歸程。木落山寒夕照深。蘆花淺舞滿江溇。霜淒野路羈人淚。冷澈空潭老衲心。感遇未容安散逸。傷時每似病呻吟。襟期漸比秋雲淡。賺世虛名懶後尋。頻年偏促寄鷓枝。敢復寧居此亂時。傲骨垂殘偏耐苦。吞聲守拙未全癡。云何枯菀爭前後。一例彭殤僅早遲。但願酒酣常對月。悠悠心與古爲期。

口高光宇和作

持螯賞菊暫消憂。最憶南湖煙雨樓。籬下誰攜彭澤酒。客中况值楚江秋。飄搖身世同園柳。破碎河山慨國仇。回首前程疑是夢。愧難砥柱障狂流。江城數載滯行旌。又值丹楓照眼明。滿地悲笳羈客淚。一林冷月子規聲。煙波我欲尋漁父。風雨誰同角酒兵。敢與黃花誇晚節。寧隨斥鷃問鵬程。甌脫縱橫千里深。挈家寄跡楚江溇。

。丹楓燦爛渾如醉。殘菊離披若有心。棖觸秋風張翰感。羈留異地子山吟。江南正是登高日。欲插茱萸夢裏尋。末路鷓鴣寄一枝。逢秋每憶突圍時。經霜骨相寒猶傲。入夢家山醒轉癡。午夜鶉聲常斷續。年來雁信屢稽遲。飄零莫便悲身世。海宇澄清會有期。

口蔣克阜和作（二首）

老至空懷天下憂。雨霖愁上范公樓。蓉經寒露還添豔。菊傲嚴霜不解秋。五夜枕戈緣寄慨。十年磨劍爲誅仇。滿林紅葉蕭蕭下。認作男兒血淚流。考槃何意望干旌。性地還輸皓月明。爽氣西來悲墨客。秋濤東注壯詩聲。黃流爲我消長日。白戰驚人却短兵。閒看風高拂雁陣。幾行健翮到雲程。

口江超之和作（二首）

誰與范公共樂憂。江樓醉臥又山樓。海湖狂拍五湖月。衡嶽獨當半

壁秋。霜骨難平焦土恨。風燐欲訴洗城仇。一聲長淚南征雁。似爲危舟叫逆流。擒王西顧見降旌。月照連營萬里明。燈火地成營火地。佛鐘聲作警鐘聲。櫓檣六合魚龍陣。風鶴三秋草木兵。消息不通籬畔菊。夕陽鴉背望歸程。

口吳挹青先生和作（二首）

一春無夢復無憂。何事連朝懶上樓。瘦馬西風遊子怨。黃花晴日故園秋。每因歸雁添新恨。但聽邊笳憶夙仇。容易光陰客裏度。華年似水向東流。喧喧笳鼓動危旌。無限鄉思對月明。金井梧桐森殺氣。玉關砧杵總邊聲。天涯車馬懷諸弟。塞上風雲念戍兵。惱亂秋心何處寄。澄清攬轡向前程。

口陳尙銓和作（二首）

簾捲西風理客憂。邇來王粲倦登樓。生涯祇合逃空谷。世事都憐異

昔秋。漸冷鷗盟違舊侶。剩呼雁陣警同仇。兵廚五載蹉跎甚。夢逐
清湘水北流。天外奇肱閃漢旌。軍容壯老漸分明。雁來又是驚弓
影。虎拜徒聞擊鬣聲。故國夢回空撫劍。明河手挽早銷兵。江關辭
賦鳴衰暮。遙挹清新向客程。

口歐陽壽仁叔康昆玉和作（一首）

故國同深工部憂。愁心遙寄岳陽樓。萬方鼓角漫長夜。一雨梧桐報
首秋。寇警莫教延歲月。客懷那復計恩仇。書生紆策君休笑。河海
從來納細流。

口陳士展和作（一首）

搖落從何寫我憂。江心清曠一登樓。亂鴉脫葉參差暮。單雁層雲映
帶秋。欲解牢愁惟酒可。莫將行事與天仇。輸君得句奚囊滿。步武
終慚第一流。

口疊韻答謝沐社同仁

詩國逍遙暫解憂。西風催上謝公樓。感深羈旅人同瘦。吟到牢愁字亦秋。寥落關山供涕淚。猖狂戎馬說恩仇。毛錐擲去雄心在。直欲投鞭斷逆流。電掃胡塵建大旌。詞人心事月華明。空將文字尊周朔。賸有詩歌壯漢聲。却敵還憑身作壘。攻愁寧仗酒爲兵。鼓鼙日夜催人老。願供鞭驅邁一程。重陽纔過已秋深。雅集欣傳楚澤潯。漣湧波翻張筆陣。楓丹蓼白麗詩心。雄詞欲奪西峴席。高格羞爲下里吟。料與漁洋同一慨。白門煙柳望中尋。秀出秋光筆一枝。風懷寫向亂離時。苦吟蕭瑟拋還戀。歸夢迷離醒轉癡。縱酒放歌應可喜。愛書作答莫嫌遲。廣陵散絕知音少。猶幸空山有子期。

沐社吟集附卷二

題社友王羽儀畫冊

口一 八陣圖

震白

名高八陣武鄉侯。一片孤忠貫石頭。猶有丹青難寫處。吞吳遺恨咽江流。

口一 春明館

前人

王郎舊是春明客。寫出春明圖一尺。春明館與春明城。此是天南彼地北。春明城中佈羶腥。春明館內揚光晶。一樣春明兩般景。王郎筆底見平生。館是郎所構。館亦郎所名。王郎王郎何爲者。毋乃懷抱光復舊物情。我羨王郎多才藝。曾造此館登階陞。四壁圖書芬若流。一庭花木淨如洗。於今不見歷三秋。脈脈相思生旅邸。題詩我

欲叩王郎。何時共醉陽江旁。

口三 前題

才毅

亂石猶存古跡奇。艱危霸業賴維支。江山從此三分定。想見隆中對策時。

口四 緯夫（詞）調寄菩薩蠻

羽霄

江行到此應驚謬。奔騰萬馬洪流惡。烏道蜀行難。何如船上灘。
拽灘多少力。一幅傷心色。對景我怛怛。恍聞邪許聲。
烏江覆舟幾遭滅頂故云

口五 前題

憲宣

波光帆影掠斜陽。來路還如去路長。歷盡平生艱險苦。仔肩何日釋擔當。

口六 前題（過岷江蕩作）

信侯

岸山如壁立。灘險水流疾。榜人汗如漿。進咫退還尺。我獨坐船頭。
。昂首長太息。縮地憶壺公。擊楫愧祖逖。書劍兩無成。况乃萬人
敵。袖手任浮沉。相對成勞逸。彼岸雖得登。仍是他人力。

口七 浮橋

憲宣

水面平鋪水底兜。行人步去不須愁。祇防旦暮風波緊。散亂收場付
急流。

口八 灩澦堆

前人

高江急峽東東津。聽到啼猿總愴神。閨婦漫疑如馬大。兵間多少遠
行人。

口九 獨秀峯

彥賓

桂林山水窟。毓秀鍾靈闕。環拱似宸星。散落如棋置。灘江流碧玉。百里相迤邐。翠巘沓層巒。奔逐如渴驥。茲惟獨秀峯。鐵柱標地紀。石磴篆蝸牛。洞漏穿螞蟻。鬼斧施神工。劈鑿何年始。搥衣履巉巖。回望勞俛睇。叢楚張傘蓋。疊綵麗紈綺。盈盈玉女峯。側髻牽簾媚。堂堂伏波山。庭前遮盾跪。飛鳳嘒和鳴。鬥鷄躍相伺。洞壑舞龍爪。清泉吸象鼻。花橋橫蝓蝥。蜿蜒碧波際。訾洲幻龜鯨。瀆蕩洶濤沸。轉瞬變晴嵐。移步換形勢。人如鉅鹿戰。叱咤風雲起。羣峯類諸將。壁觀莫仰視。斯峯擬人倫。應作英豪士。挺立絕傍倚。兼善集衆美。恍入山陰道。夢遊百寶肆。耳役萬籟聲。目迷五色紙。雲濤盪胸臆。花氣襲衣袂。鼓勇凌絕頂。舉目空一切。招手呼黃鶴。直度超塵世。鐵笛倚長空。金聲白雲曳。豈惟題陵谷。神與天地契。回頭笑達摩。十年守半偈。

口十 前題

拔地聳孤岑。冲霄接北辰。是何年石破天驚。一隕人間經萬劫，猶似有，補天心。一抹遠霞明。臨風弄晚晴。香烟鬢霧鬢亭亭。靈秀天然推獨步，揮妙墨，更娉婷。

口十一 前題

憲宣

挺立灘濱一柱圓。凌雲氣概欲擎天。四山多少高頭地。盡在扶持倚傍邊。

口十二 前題

君放

一柱擎南天。雄風自凜然。雲蒸花宿霧。月靜鳥眠烟。吐氣凌蒼昊。栖心繡碧漣。圖成磐石固。八桂企中堅。

口十三 前題

味辛

桂林山水好。獨秀獨巖巖。銳拔參天表。鬼奇入化工。晨曦浮黛碧。

夕照衣霞紅。難得長房術。搜將尺素中。

口十四 前題

才毅

見危寧惜死。青史永留名。千載高峯在。彌深吊古情。

口十五 南嶽祝融峯

甯僧

多少名山付劫灰。巍然一柱楚天開。昌黎筆底無窮意。却被先生翦取來。

口十六 前題

志中

絕頂登臨處。靈山黯幾重。丹青合有契。寫出祝融峯。

口十七 前題

才毅

峯矗萬山低。雲間日落西。千年留古寺。鳥逐梵鐘啼。

口十八 薛濤井

甯僧

君不見苧蘿村。浣紗一去了無痕。又不見胭脂井。景陽宮殿鐘聲冷。
興亡遺恨美人多。念家山破定風波。何如此井自今古。一任滄桑
眼底過。井以人傳井得所。人已不知在何許。風流消歇幾何年。但
聽千山叫杜宇。雙眸翦水水爭妍。兒家本住錦江邊。不去江頭濯雲
錦。却來井上擘花箋。花箋泛出嫣紅色。飛入詞場傾翰墨。洛陽聲
價何足論。聊借時人喧瞬息。吁嗟夫。誰知慘淡經營心。化作寒泉
深復深。王郎好古恣憑吊。直擷清芬入墨妙。料應下筆若有神。如
見當年汲井人。

口十九 前題

錦官城外浣花溪。杜宇無端盡日啼。絕代佳人今已杳。空餘古甃任
留題。

口二十 成都武侯詞

前人

治蜀大名宇宙垂。千秋遺愛有崇祠。撫今思昔情何限。想見芸窗澹墨時。

口二十一 過山路擔

彥賓

岌岌山亭路遠悠。鐵肩擔盡更何求。一雙行脚尋羊徑。無數飛花打馬頭。逐隊踏殘千里月。放歌叫破萬山秋。得錢沽酒相扶醉。人海寧知沈與浮。

口二十二 興安分水嶺

前人

九巖連雲四時雨。千丈澗飛分水塘。春流碧玉秋明鏡。曾不容舟可濫觴。一朝南北各十里。洪濤疏決離與湘。匯泉集澮蓄異勢。滔天浴日光茫茫。靈渠之水靈何許。冰淵疑是蛟龍藏。偶得風雲破壁去

。爲雲爲雨蘇窮蒼。水哉水哉民之福。東南中澤田爲沃。永願安瀾
涓涓足。大麥小麥滿坑谷。村村社鼓報秋熟。家家競致豚蹄祝。逝
者如斯夫。莫厭出山濁。

口二十二 黃巢嶺大樓

趙之

玉章持重正匡廬。古柏森森憶北都。鼎足南天撐日月。幘幪后土展
江湖。丰神不讓竹君子。氣節平分松大夫。怪傑人間多故事。夕陽
陰裏話樵漁。

口二十四 海棠溪

前人

南越車轍東吳船。衣冠薈萃國門前。雄樓傑閣新興起。天籟江聲共
喧闐。龍杵倒上黃桷嶺。虎車騎上南溫泉。立馬老君岩頂望。一版
山河浮翠烟。別來萬里惟夢見。籠入摩詰袖底邊。

口二十五 前題

才毅

蜀道崎嶇阻客程。雲中飛渡一川明。層巒翻作培塿看。錦繡山河隱赤城。

口二十六 七星岩

君放

列宿垂文彩。光凝碧漢間。竭來灘水畔。突兀露風鬣。洞壑彰奇蹟。山花解笑顏。傳神盤大筆。仰止任栖攀。

口二十七 前題

信侯

芙蓉高萬仞。勢欲摩青天。岩以七里名。不知始何年。中有石鐘乳。纍纍似珠懸。怪石化魚龍。隱隱肖飛潛。泉作在山清。激之聲砰然。在昔爲滄海。今則變桑田。行人秉燭遊。幽邃山腹穿。畫師運匠心。有筆大如椽。胸中具邱壑。腕底起雲烟。繪聲復繪色。妙到

秋毫巔。豈僅貽千載。還與山並傳。莫污寒具手。珍重此名箋。

口二十八 避空襲圖（調寄陌上花）

羽 霄

晴雲萬里，一聲風鶴，滿城驚訝。轂擊肩摩，頃刻瀟瀟平野。登臨那有逍遙意，但有汗珠盈把。更喘呼告語，快藏巖洞，上空來者。戒無言靜聽，機音漸近，只恐禍從天下。故故盤旋，報道尙餘三架。盼歸直待陽烏匿，險些幾將身捨。又中庭佇望，月明如此，奈何今夜。

七星岩。桂林勝境也。樹蒼草茂。岩廣洞穿。民三十三年秋。桂林淪陷之前。或星月之夜。或晴朗之天。男者。女者。老者。少者。健者。弱者。跛者。瞽者。步者。趨者。輿者。車者。騎者。負者。戴者。担者。櫛者。攜者。孕者。或立。或坐。或臥。或伏。或蹲。或倚。或踞。水之涯。岩之邊。樹之下。草

之間。一時紛然。果何爲者。則避空襲是也。羽儀先生。以迂
倪之筆。寫傷亂之圖。旣成。屬題記於予。斯圖也。繪形繪聲
。惟妙惟肖。流民一幅。當時之急景愁披。盛世同登。此地之
清遊忍續。蓋爲予題詞之所不及盡。而亦不能盡也。乃復爲記
之如此云。

沐社吟集附卷三

挽同社殉難諸友

敘言

乃偉

黔桂之役。本社同仁隨家轉徙顛沛流離中途罹難者。計有饒崇德、馬文青、王君放、鄭秀餘、張用魯及王凝生、王憲宣昆仲諸氏。或死於敵。或亡於病。或遇匪而喪生。或墜車而斃命。當時余等亦與投荒。百劫餘生。幸逃虎口。此日來客西蜀。驚魂待補。喘息未安。忽傳平寇收京。因思還鄉約伴。往事緬懷。彌深慘痛。感哲人之遠逝。念舊侶之長眠。魂歸何所。有賦難招。淚下和墨。長歌當哭。豈計工醜。聊表哀忱云爾。

口一

古人今安在。求之苦不得。化鶴渺爲蹤。使我長惻惻。憶昔結詩盟。
。天涯同寄客。淹留桂與湘。山水供遊弋。拔幟上騷壇。吟箋勞分
。壁。賭唱鬥尖叉。推敲到平仄。句妙古風追。律協標清格。擲地自
。成聲。匡時垂典則。舖啜亦風趣。爲是文章伯。努力挽衰頹。要亦
。尊詩德。樂此未覺疲。風雲又變色。何期風景地。結緣遭慳嗇。忽
。傳寇已深。敵騎來頃刻。直入若無人。千里城關闕。吾輩恥受辱。
。倉皇走荒僻。蜀道本難行。步步入荆棘。望月已幾圓。長征猶未息。
。疾病頓侵尋。飢寒復煎迫。大難臨衆頭。微命卜朝夕。君等信艱
。辛。呻吟已無力。撒手脫塵寰。遺蛻委路側。亂離竟至此。浩劫慘
。終極。知君目不瞑。我也淚沾臆。感逝賦大招。九天仰冥翼。清酒
。以爲饑。魂兮來無隔。重光見神州。昭蘇應殺賊。一快豁煩胸。念
。君淒停食。惟望入夢頓。猶得商吟策。

口二

信侯

乾坤厄運亂方長。八載龍戰血玄黃。舉國士氣爲之振。殲敵曾紀台兒莊。湘北三次傳大捷。戰果猶聞說輝煌。今也日蹙國百里。遂使敵勢日囂張。寇氛所到閩閩墟。人無老幼皆逃亡。三戰三北士氣餒。坐着胡騎下衡湘。吾儕同人動數萬。到此始知疏散忙。咸謂交通有黔桂。先敵而走總無妨。早知車輪推不轉。安步當車計亦良。羣衆尙冀車能走。總比人力快且強。卒致誤盡乃公事。敵人已至始驚惶。棄其衣物各自走。父母妻子顧不遑。秀餘墜車聞慘死。用魯餓斃委路旁。王子藁舫病大漸。與子永訣語堪傷。凝生老友中途遇。息足適與共一房。猶復軒渠向余笑。今日與君上下床。年高不耐中途苦。一豎竟已入膏肓。乃弟精幹號短翁。因受刺激病顛狂。死者屍骨倩誰收。蔓草荒烟飽虎狼。含痛我爲諸君哭。臨風熱淚洒千行。

口三（調寄望海潮）

彥賓

天崩地坼，山枯海泣，驚心外患頻加。蕞爾島夷，凌我上國，怎禁封豕長蛇。往事正堪嗟。奈狼烟又起，籠罩長沙。烽火瀾漫，六軍空自擁高牙。者番浩劫靡涯。歎三湘八桂，千里無家。悵望暮雲，愴懷舊雨，此身幸入東巴。夢曉轉窗紗。聽蘭陵新曲，不聽胡笳。異日重開社集，孰與鬥尖叉。

口四

彥賓

帝釋昏昏天欲死。直任江豚吹海水。斷鰲無復任公子。神州陸沉半人鬼。甲申兵劫事哀傷。洞庭倒捲灌瀟湘。血痕染遍蒼梧野。人間化作修羅場。夜深軍帖傳官府。力難遏敵先焦土。百萬災黎走大荒。崩濤奔向黔桂路。黔桂之路如梯山。迴龍九折紆且艱。黔桂機車麻且屨。進寸退尺蝸篆竿。獸蹄雜沓風掃葉。難民鼠竄肝胆裂。棄室拋兒魄蕩搖。裹創扶病啼聲徹。嗚呼一歌兮聲變徵。巢傾覆兮雛

卵毀。望鄉邦兮空徙倚。感故舊兮淚清泚。

我友我友鄭秀餘。博聞學富五車書。蓮帷借箸資倚畀。數載侯門長曳裾。韜鈴廟算固整暇。偶發詩歌殊清腴。憶從沐社騷壇會。手執牛耳捧盤盂。酒酣門韻誇纖巧。迴環酬唱疾援炮。倉遑外敵相翦屠。履艱蹈險攜妻孥。龍蛇厄閏長唏吁。舉家殉難翻戎車。魂歸來兮啼杜宇。行不得兮哀靈鵠。嗚呼再歌兮淚欲枯。愴懷哲人兮黃公鱸。痛憶友生張用魯。冲懷恬淡常敦古。同是離家嶺外來。雁聲共聽衡陽浦。客窗夜話酒頻澆。醉臥歌呼忘爾汝。士窮見節倍憐君。寒夜抱吟語酸楚。(君作寒夜吟酸辛悲悄不勝卒讀)豈徒共濟得同舟。唱和應聲蛩與蛭。東風撼樹鳥分飛。連夜突圍驟失伍。噩音傳訊信還疑。哀君慘遇絕寰宇。并命鴛鴦陷獸圈。背攜稚女病且罄。黑石關頭鐵騎追。徒行千里斷糧糈。鬼妒詩才似杜陵。一朝絕食殉牛脯。

烽烟遍地骨難收。遺嗣流離誰與撫。嗚呼三歌兮聲愈苦。人琴邈兮淚如雨。

王子王子號君放。五言佳句推宗匠。迴雁峯前泮社期。含英茹雅百花釀。拔劍常爲斫地歌。風流蘊藉陶元亮。自從國破賦西征。重繭裹足攀層嶂。風餐露宿千里行。吟肩瘦盡侵嵐瘴。劇憐客地扶幼兒。孤館寒燈侍屬纊。辛酸猶盼復中原。祭告而翁囑勿忘。仰視穹蒼真夢夢。胡爲竟教斯文喪。嗚呼四歌兮歌聲愴。誦遺文兮空惆悵。臨風而隕涕兮奠幽壙。

沐社王家兩兄弟。長公髯叟號寧僧。吐談儒雅四座傾。季方短翁善短兵。又尖賭韻騁縱橫。騷壇獲此兩怪傑。席中珍視瑰與瓊。詩酒歡場戒幻夢。狼烟瀰漫心魂驚。髯叟殘年苦遠征。暴風乍起梁木崩。短翁友愛哀惻惻。中風狂疾髮鬢鬢。人間慘劇誰似卿。我欲叩天莫名。嗚呼五歌兮腸斷聲。安得猛士守龍城。一清宇宙兮弭戰爭。

口五 吊王凝生先生

震白

碧草千年白骨香。風流空憶輞川王。征鴻失侶惟杯酒。殘雁無聲墮野塘。篝火行來塵漠漠。吟魂化去月蒼蒼。人情怕說秋雲薄。皓首怎教走大荒。

口六

味辛

天心未厭亂。寇勢復披猖。湘桂胥淪劫。軍民共竄荒。悲風吹黑塞。大夢醒黃梁。多士偏逢厄。羌余獨斷腸。

倉皇奔驛路。把手話酸辛。

金城江晤鄭秀餘河池途中遇張用魯獨山晤王凝生各道辛苦不勝悽楚

鼓角頻催別

輪。魚書久漸湮。忽聞歌薤露。長慟哭靈均。千古傷心處。荒丘月半

憶昔聯吟日。山顛復水濱。桃花吟雨後。紅葉鬥霜新。

昔日登雁峯臨湘水吟桃花而

詠紅葉綺思競發逸興
遄飛今則不可復得矣
妙句應無匹。玄思若有神。祇今推聖手。痛念北邙

人。凝生秀餘才情卓
越同仁素所折服

我疊秋心韻。君言語不祥。余和震白秋心詩有傲骨垂殘
彭殤一例等句秀餘謂爲不祥翻憐蒲柳質。尙

寄剎那場。報國成虛願。偷生亦可傷。天涯哀故友。和淚酌清觴。

口七

懷久

論交經歲月。文宴數追陪。品德標清格。詩歌見逸才。如何懷瑾璞。
。竟使委蒿萊。回首湘黔路。兵車事可哀。
捲地風沙惡。胡笳急暮秋。艱危辭故土。患難失同舟。悵望音塵絕。
。空悲楮墨留。羈魂應不泯。天道叩悠悠。

口八

羽儀

清晨尙覺雨瀟瀟。湘桂驚魂久未招。亂後故人音問少。渝中孤客自

無聊。衡陽壘卵誰過問。全縣崩離虜正驕。却看舉家鋒鏑近，更無
車輛旅途遙。男兒豈肯淪強寇。婦孺終愁受脅剽。躑躅不堪飢餓迫
。艱辛難禱病魔饒。傳聞夫婦戕輪下。又說殘生棄野橋。玉碎幾人
空落淚。瓦全猶自感萍漂。賈生痛哭情難訴。屈子行吟恨未消。多
少將軍非負腹。功名無讓霍嫖姚。

口九

劫剛

凝生對酒吟尤苦。綴句奇如操鬼斧。銀燭高燒擊唾壺。門韻深宵憶
津浦。八年抗戰湘桂綫。短鬢添霜復相見。鶴淚聲驚蜀道難。促損
浮生如露電。爲君剪紙招魂兮。路漫漫兮雲低迷。乘迴風兮其奚栖
。問天不語悲悽悽。

秀餘身長雞羣鶴。短髯高顙懷落落。自言喜作汗漫遊。半生空負縱
橫略。河山無恙一微軀。寫盡君家鄭俠圖。行行中道隕車下。荻花

瑟瑟風呼呼。

戲署短翁王憲宣。霜毫落紙如犇泉。只緣敵騎分鸞侶。不勝激刺爲狂顛。

用魯中途失良偶。戎馬愴惶負女走。絕食不關恥周粟。委骨何曾正邱首。有時亦作驚人句。劫灰遍地終不朽。

藥舫王君貌謙和。詩壇宿將人推他。敵饑漫天羣動竄。長途病倒其奈何。心知命不懸朝夕。淚眼磨兒速行役。遺蛻誰爲覆土坏。一泓秋水無情碧。

口十

才毅

襖集避峯甫兩年。胡騎倏忽逼南天。三湘風雨增愁緒。八桂雲山失故妍。暴寇縱橫氛愈熾。義民跋涉志彌堅。柳江清澈驂難駐。黔境崎嶇馬不前。報國愧無三尺劍。攜家誰具萬鈞肩。重車輾轉堙西路。鐵翼翩翩逐北遷。途常遇盜憐空手。車不救人只愛錢。蟻聚金城

皆律步。蛇行鳥道斷炊烟。傷心玉帛成灰燼。極目干戈蔽嶺巔。重
峯伴白骨。依稀殘月照紅顏。坡開陡路繞山轉。雪壓孤衾擁骸
眠。稚子牽衣終委棄。衰翁裹足敢留連。悼君永作異鄉客。何日招
魂灑水邊。

口十一（調寄奪錦標）悼鄭秀餘

禮文

紅葉聯吟，桃花鬥韻，結社相盟萍水。同樂從前暗想，龜嶺飛觴，
雁峯修禊。記東行小別，壯行色，詞新詩麗。自夷歌，陣轉踪離，
悵望雲山何際。屈指傷時感事。已死人心，此語至今曾幾。亂裏
浮生如夢，身等蜉蝣，命猶螻蟻。念降旛未覩，正秋深，天涯嘆逝
。對遺篇，可勝欷歔。不覺潛然流涕。

口十二（調寄水龍吟）悼鄭秀餘

羽霄

天涯寥落晨星，哀歌忍聽江關動。多才自負，滿懷孤憤，使君酒縱

。詠罷梅花，吟成桃葉，藻思雲湧。儘文章有美，河山無恙，當此世，知何用。記否臨歧珍重。奈倉皇，轅閭攀擁。胡兵未接，君身先隕，鴛鴦命共。君死毋悲，我生奚樂，南柯原夢。君金縷曲詞有句人世南柯原一夢縱囊餘寶劍，塵寰甚處。掛斯人壘。

口聞報收京追念凝生憲宣昆仲

平生風義兼師友。要數君家兩弟兄。患難十年同作客。懷才一輩幾知名。斯文遭棄天猶喪。頑敵恃強國總傾。聞道收京烽火息。却憐無命見昇平。不見寢門淚已傾。如何元季盡逢兵。天於文士真云酷。我與詩人獨有情。檢點遺篇知可貴。思量往事怕重陳。自從喪亂風流歇。求友嚶聲久未鳴。

沐社吟集勘誤表

頁	行	字	誤	正	頁	行	字	誤	正
五八	八	註六	頓	頻	八八	四	二	蘇	蘇
五三	三	一三	失	欠	七七	〇	二五	鐘	鐘
五〇	九	一五	涼	綠	七七	八	一六	重	里
四九	八	一九	獨	猶	七五	五	二二	想	相
二五	四	一	遊	邀	三九	二	六	立	女
二五	二	一七六	懷述	述懷	三九	〇	一三	涼	掠
二二	五	二二	臻	臻	三九	〇	四	未	未
二二	三	九	具	第	三八	八	六	欸	欸
一九	二	五	益	盃	三八	五	四	變	雙
一七	五	一九	獨	猶	三六	〇	六	愉	愉
一二	八	二五	大	天	三六	三	七	休	體
三	三	一六	芩	岑	三五	九	二二	之下	〇
二	二	二二	字	水	三四	五	五	遇	過
二	二	三	夏	夢	二九	五	九	之下	空格
題詞									
蘇	鐘	里	相	女	掠	未	欸	雙	愉
一一四	一一一	一〇九	一〇九	四九	四七	四六	四四	四二	四二
四	六	一〇	六	一	三	二	二	八	七
一〇	六	一	一三	一五	一八	五	二四	二二	三
綠	抵	流	稍	到	恨	社	繼	漏	大
綠	砥	流	稍	別	美	社	斷	鄉情	月

一四九	一四八	一四七	一四六	一四六	七四	七四	七四	七四	七三	六〇	六〇	六〇
八	四	六	十二	三	四	三	三	二	二	六	二	一
一六	一六	七	一七	一	一一	二〇	二〇	二〇	五	四	二〇	二二
輸	後	遞	畫	山	應字下	應字下	倩	應字下	句末	間	借	經
踰	復	遞	畫	霜	空格	空格	荷	空格	雁峯迴	開	惜	徑
	一五六	一五四	一五三	一五〇	一〇七	一〇六	一〇一	一〇一	一〇一	九七	九六	九二
	四	二	六	二	六	八	一一	一四	四	八	六	一〇
	三	一	一	二	〇	五	二	二	二	二	三	一九
	四	三	二	營	閒	雪	草	春	戀	漏字	士	惜
	四	二	三	瑩	開	雷	阜	信	春	水	土	提上格
	一七六	二七一	一六六	一五七	一四五	一四三	一四二	一三四	一二七	一二五	一二四	一一五
	五	一一	一	二	一	五	二	六	三	四	四	六
	題下	一	一	一	一	七	二	七	二	二	一	一〇
	湯字	必	爲	香	着	重	覓	魂	京	有	綠	風
乃	俸	矜	無	看	看	里	見	魂	爭	贈	綠	雨

Handwritten scribbles and marks, possibly including the number '10' and other illegible characters.

